

晚晴籀詩匯

第六三册



晚晴移詩匯卷一百六十五目錄

瞿鴻禛 十二首

勞乃宣 十三首

張佩綸 三十四首

鮑臨 一首

吳觀禮 九首

陸廷黻 七首

陳寶 十首

雷鍾德 十一首

羅大佑 七首

汪昌 一首

邊淪慈 四首

嚴玉森 三首

陳允頤 三首

彭祖潤 二首

周炳蔚 一首

孟繼堦 二首

唐贊袞 二首

何延慶 三首

葉大莊 十一首

李超瓊 八首

張清瀚 一首

莫炳湘 一首

劉大受 入首

郭福衡 一首

吳繡虎 一首

秦樹敏 一首

王錫勳 一首

凌顯開 一首

葉正森 一首

孫昌 一首

劉寶 一首

吳勝 一首

李鳳 一首

李鳳 一首

吳勝 一首

晚晴移詩匯卷一百六十五

徐世昌

瞿鴻禨字子玖號止庵善化人同治辛未進士改庶吉士授編修官至外務部尚書協辦大學士諡文慎有

瞿文慎公詩選

詩話文慎早歲掇科第官侍從屢持文柄旋被東朝眷遇入贊樞府坐事論罷晚居海上與庸盒蘇堪乙庵諸君為文酒之會詩條達周密猶有乾嘉前輩矩矱

題劉君浯溪釣隱圖

浯溪岸曲迴明漪古木蔽崖陰倒垂風吹釣船自來去幽意獨寫無人知白鷗與我同浪跡手持釣竿坐盤石日暮空歸亦自佳本不取魚惟取適

七日伯嚴招集樊園探梅

春來未識如新交人日出訪郊西郊羅浮縞衣忽到眼一
笑媚嫵開林梢初尋籬角露冷豔斷橋野水輕冰膠參差
繞屋三十樹疏影破空橫凍蛟海旁蜃市金碧氣徒眩俗
目紛喧呶樊山寄廬獨娟好園亭到處合紅苞坐看香雪
噴成海直擁仙雲圍作巢偶從人外憩清絕得此佳趣知
天教陳遵愛客續嘉會乘興招賞羅杯肴欲將畫意寫蕭
澹未盡詩妙空推敲關山莫憶斷魂日且向天涯隨結茅
傾觴痛飲蕩塵抱不爾正被梅花嘲

甲寅三月三日補松招飲樊園新居看碧桃花

去年三月斜橋西衣上紅沾杏花雨樊園此時未有園今
日樊園成地主一廛買得遠塵囂半畝平分學農圃不種
桑麻種花竹穿林百鳥來歌舞柳條婀娜拂金縷柏葉鮮

妍張翠羽碧桃六樹傾城立粉白脂朱嬌欲語笑倚春風
醉半酣然照晴雲豔初吐先生好花如好詩意奪化工天
可補移根幾日便爛漫特與幽居生媚嫵元都觀裏空無
存度索山前杏何許乞栽獨送浣花村入畫真成朝川墅
延陵父子雅好事求友嚶鳴欣得所山陰脩禊第二春從
借行廚飲吟侶武陵仙源那得入問津疑復逢漁父海瀕
一日不還鄉歲歲來尋此花塢行看十丈出垂檐高放紅
霞滿庭戶莫教損折問公幹酒興不空須記取花下飛腸
酌酹歸更肯夜游還秉炬

樊山有詩留別同社索和與乙庵同次原韻

從來樂道不憂貧天問終難測蓋渾昨夜微霜催客子明
年春草憶王孫飄萍聚散真無定蟠木輪囷自有根夢裏

東華風景異銅駝應感止車門

盟主風騷上將壇朋簪頻盍筍皮冠逍遙豈待培鵬背造
化奚爲弄鼠肝別意去隨江水盡無心出作岫雲看掉頭
巢父歸應早東海珊瑚拂釣竿

乙卯二月予還湘省墓散原亦返靖廬適同輪舟乃
彼此不相遇悵然久之抵滬晤散原言發南昌時
方意歸途邂逅有詩見憶爰和此篇

雲迷宰木連山岡清明淚灑游子裳感君昨歲已上冢念
我久客從還鄉同舟並發不自意共一老禿須扶將峨峨
巨艦失交臂判隔戶牖藏蠶房初聞喜躍繼怙悵咫尺離
合成參商誠通肝膽絕楚越不見蔑面庸何傷回帆邂逅
入夢寐握手袖眎瓊瑤章懸求友聲出巖谷春風簧囀調

清吭晴廬誦芬慕前烈瀧岡樹表今歐陽吾翁執友愴宿
草兩家舊德俱義方百罹流徙詒餘痛濁世禮壞川無防
墓門斧棘鬱松柏歲寒晚節敦偕藏抱殘各守遺經意忍
飢濡煦聊徜徉

送伯嚴還金陵散原精舍

舉世共安託憐君聊復歸悠悠大江水厯厯故園扉雨砌
花垂晝風簾燕怯飛淵明北窗下猶有酒觴揮

節庵歸自焦山屬爲海西庵僧慧松寫詩因作此

眼底金焦幾變遷舊游如夢夢如煙幽情付與葵霜老古
寺殘陽聽暮蟬

避世高人故隱居瓜牛今日更無廬石門夜話尋禪榻一
葦江天縱所如

理安寺

山行窅無路盡被稜枿占叢桂繚連蜷淮南無乃僭金風
散天馥吹襟想清豔欲返秋懷悲轉惜春游欠理安存紺
宇望古發深念季宋儒效微不如三尺劍茫茫橫江流何
處見天塹且說三乘法真空依淨梵香積分伊蒲老甘蔬
筍饜游情鍾王蹟石墨照翠爛

泛西溪至交蘆庵

西溪狹如溝小艇僅容槳攜家促膝坐跼曲不可仰微風
吹一葉穿影亂菰蔣泛淺出虹橋底磨石瀨響童孫初識
船嘔吐惡搖蕩樊籠銳欲脫推篷感其顙強挾游蘆庵林
壑接幽敞趣怡戴奚畫靈肅杭厲饗清堂燕留客野菽飽
僧餉輿人遲失期花塢欠一賞灑然羞歧路薄暮理歸榜

虛舟觸無心何礙適莽蒼重來看秋雪留待攜壺往

法相寺老樟

掀天古樟老氣凝屈鐵作幹嵌金繩戟髯山立巨無霸控
射強弩橫修肱太陰倒垂雲雨黑霹靂破裂雙龍騰寒芒
凜凜鱗甲動遁避不敢棲鴉鷹我尋山寺訪神物拄杖逼
視愁攀登從來不材赦斤斧有用幸免誠天矜風霜干禩
鍊堅節閱劫世遠忘衰興佛鐙隔院照遺蛻不死能陪長
耳僧

勞乃宣字季瑄一字玉初號矩齋又號勒叟桐鄉人同

治辛未進士歷官京師大學堂監督署學部副大臣

詩話玉初樸學篤行承其鄉楊園三魚之緒率畿南
有惠政知吳橋義和拳方起玉初廣採舊聞證爲邪
教其時紅巾白刃徧於輔郡而縣境獨不敢肆以是
知名游膺內擢辛亥後去位初居涑水旋移曲阜又

至青島爲德人尉禮賢講經迹韜聲堅苦卓絕
詩倦懷禾黍而不爲促數噍殺之音稱其雅操

劉聚卿參議出示大小二忽雷唐宮樂器也

示我當筵兩忽雷劉郎古意抱瓊瑰摩挲別動興亡感曾
奏唐宮法曲來

過金陵豐潤門

江表迴車日未昏淒涼豐潤有新門經過莫制西州淚碧
血難招蜀道魂

題自訂年譜後

偃蹇乾坤一腐儒老來牛馬任人呼銅仙閱盡滄桑劫賸
有難忘是故吾

吾謀不用拂衣歸繞屋清流靜掩扉領略鄉園風味好冬
春米輒晚菘肥

築室盈廷社鬼謀坐看魚爛更誰尤鴻飛祇有冥冥去回
首天閭涕莫收

回頭往事已成煙聊記鴻泥舊日緣自序敢希班馬筆願
隨五柳傳同傳

車廠歌

車廠村青山爲壁溪爲門中有良田幾千畝父老菑畚子
孫守上有租稅供天家下有餘糧活子婦生不見縣吏面
老不入縣官衙年年飽看桃源花一朝部符忽下縣農家
田是王家佃分茅故府有藏書蕞爾齊民敢私擅赫赫王
家奴巍巍賢令君紅旗耀白日徧插峯頭雲峯頭雲淚如
雨從此農家無寸土王家賦重皇家輕嗟我乃作王家氓
催租吏來穀未熟雞飛過籬兒女哭吞聲不敢惹吏嗔拌

向前村賣黃犢我今捧檄來諮詢村民語我雙淚淪但願
死作皇家鬼不願生作王家人村民村民毋感感此日明
良正相勛爲爾譜作車廠歌聊當監門圖一幅

後車廠歌

晴巒抱叢薄野水縈孤村驅車犖确中來款村肆門坐中
一老叟白髮垂繽紛叩我來何方問姓驚重陳曩有勞委
員按事曾來存今君與同族彼是君何人笑言我卽是狂
喜如有神大呼是天降果是吾神君吾村昔年獄家家皆
戴盆鷹鷂一搏擊怨毒從茲伸荏苒三十年念誦今猶新
導我還其家兒女羅餽餼偕我陟林麓指點鴻雪痕峯嵐
猶藹藹原隰猶杳杳回首若夢境恂恍移心魂老者聞我
來重道當日恩壯者聞我來緬述兒時聞雜遝話舊事語

拙情彌真愧我德涼薄得此殊不倫此邦俗良厚足可稱
里仁願言挈細弱來結山家鄰爲我求山田叱犢耕春雲
爲我覓村舍茅檐納朝暎呼兒學把耒植杖觀耔耘晨炊
飽脫粟夕膳甘菜根願爲童子師執卷故業溫理亂不入
耳共作羲皇民夕陽下西崦我僕促返輪幽棲堅後約臨
別還諄諄

歸耕釜麓出都感賦

南雲望斷故山蒼且荷犁鋤倚太行漁父笑人殊楚澤居
民愛我卽桐鄉漫將食藿歌空谷便擬牽薇步首陽迴顧
觚棱天尺五臨歧惟有涕浪浪

和沈盦守歲感賦用元遺山甲午除夕詩韻

發憤誰能識史遷無言我欲效焦然浮雲身世離羣雁逝

水光陰下瀨船舊歲幾人思漢臘寒宵有鶴話堯年山中
甲子今何日醉讀離騷獨問天

劉農伯過訪靜公適至談論甚快別後有詩見寄依

韻答和

曉月猶懸玉一彎蓬門無客晝常關故人方喜騎驢到鄰
叟俄逢弭策還世事共悲淵底日鄉心對語夢中山何時
雙槩桑陰下與子追隨十畝閒

題青島新居

海色蒼茫外還疑別一村窗虛山作畫林密樹爲門宴坐
時忘我攜行或弄孫不知寰宇內萬里戰雲昏

雨中偶作

細雨霏霏釀暮寒春深猶怯敝裘單崖根石潤生新溜樓

角窗虛失遠巒海上書詩債逼山中無事睡鄉寬胡牀
且覓瞢騰夢一任林花滿地殘

張佩綸字幼樵號蕢齋豐潤人同治辛未進士改庶吉

士授編修歷官候補四品京堂有澗于集

詩話蕢齋論詩雅慕玉局以爲天資學力直合李杜
爲一手而氣節過之嘗取諸家注本有所補正早蒙
特達中更謫戍遭際尤與相類出塞後諸詩閱壯悽
惻往往得玉局忠愛之旨近體縝密高華伐材既富
隸事尤工身世家國之感文深而意遠早
歲嘗爲玉谿詩作注知宗尚又有在也

書陸月湖先生手校宣公奏議後

龍門傳賈生不載治安策至今悲長沙如對宣室席眴京
豈良史唐肆求馬迹勝子加點竄貌形神已隔嗚呼唐貞
元聰察亦令辟朝困二吳讒夕受一裴厄冰炭固宜然蒼
蠅豈愛壁鄴侯時無倫造膝全國脈垂死引晉參遺賢吁

可惜頗疑史失之家傳彙盈尺嗟哉君子操介立如松柏
嗟哉小人交奪正如朱碧德孤且不鄰物腐易求隙未相
道已睽焉免忠州謫太息建中憂泚光竟尋逆三軍涕何
從禹湯能自責功同衣白人靈武贊謀畫天非材不生相
在君之擇誰與裂白麻陽城空有驛誰與進奏疏端明亦
終斥契合世固難弔古無荒宅吾師理殘編誤本親糾摘
卽今中興年抱道辭徵辟閱世有名言出辭戒直迫諷諫
意纏綿君心匪難格何用撮古方活世此砭石

柳叟招同人復游葦灣用伯潛韻

前游未及旬出郭復蠟屐山容幻曉晴野色炫餘澤清渠
靜不風秋意漾水碧主人不解耕以花作阡陌波清代山
綠菱芡恣餉客煙水二頃餘鷗渚拓圓席孤亭始何年俯

仰憶疇昔涼風對面來薄爽生兩腋坐久忘形骸不覺日將夕

七月四日圭盦復招同人由天甯寺至北河泊觀荷仍集葦灣柳叟醉墮水再用前韻調之

侍御興不淺老理庾公屐水仙亦親人沐浴振薌澤秋色撲畫窗杯浸太行碧俯視萬花笑輕塵淨綺陌茅屋倒清尊列坐忘主客我醒已若狂杯來不避席餽醑舖其糟甯辨昔酒昔失足墮水中患乃生肘腋恨非新豐市一笑竟千夕

丙戌重九用東坡丙子重九韻

親友望我歸我歸固無家茱萸徧朝士何必手得花茶香足當酒半銛通犀窠野果亦可口不辨橘柚祖堂堂白日

去迅如赴壑蛇杜陵老未達登臺動咨嗟君看田間飲年
豐話桑麻或有臨江閣孤鶩飛落霞斯世同一醉秋心浩
無涯橫風吹雁過萬樹棲昏鴉

故人夙戒我同蹇北山雲乘興忽中敗勞哉章使君今年
山雨足高土生苔紋奔流下冀野糜沸如湯沄恤鄰不閉
糴佳節敢犒勤荒居尙得蟹惠與三老分此邦歲獨樂蔬
蕨緣溪瀆我憂亦何補閒入麋鹿羣盡遣百朋從隨在生
幽欣鄰翁爲我計便乞營田耘

薄暮石秀才儒珍自宣鎮至欲陪余登雲泉山不果
呼酒夜酌便用前韻贈之

誰齋龐通具直入淵明家籃輿欲命駕山僧亦無花清泉
自寒冽絕磴時敲窰晴沙莽千里歷歷見翟祖猛石伏如

虎長川曲如蛇挾君幽并氣望遠空吁嗟俯仰憶陳迹知
舊餘疏麻佳辰賸獨笑山月斟流霞君來已不寂爛醉吾
生涯何必登高賦戲墨聊塗鴉

處士水北隱游蹤漠南雲屢騎將軍馬久客平原君口數
卅六國燦若掌上紋我心已止水波濤不汙汙雖羨投筆
壯肯輟蒔藥勤雄談五斗後不覺靜夜分老坡瘴海謫新
居枕江濱西鄰翟夫子索漠聊爲羣眼前此異客秋谷春
欣欣勿預龍山會從我歸耕耘

過嚴子陵釣臺

沛公故人主吏掾暮年徒跣謝前殿當時祇有張子房能
致商芝來侍宴英雄使君帝室宗師盧從鄭臣卧龍龍卧
疆爲三顧起釣竿茫茫獨煙水沔南醜女不歸山卻羨梅

家壻鄉美皇漢三君乃一流儒風道骨邈無儔帝坐輝光
客星去俯視列宿猶通侯懷仁輔義天下悅阿諛順旨要
領絕兩言咄咄卽諫書進退確然此高節君不見翰林李
白謫仙人亦慕先生事隱淪一誤樓船成放逐太息香鑪
非富春

塞上食物將盡得乾魚數番下酒醉中作

突黔餽塵菜空盃朵頤忽動江湖想魚鼈難升吉甫筵植
鱈媿肖胥靡象渾河泔濁不藏鱗那似清冷容結網謫庖
商度到蕘物義不及賓堪一饗莫嫌乾枯少滋味觸手腥
汗先滌盪固知受炙更芳薌何苦登盤仍木彊餘腊投地
狗莫牙短鋏辭門客誰餉可哀便似武夷君恨少虹橋孤
月朗虛齋薄飯獨謀醉歸夢濡溼觸菰蔣稻花十里漲初

肥徑尺生鱗觸竿上漁山止合具煨蠶綠木可憐逢罔雨
空煩涇沫相响濡波臣肯乞升斗養孫叔殘羹枉自調子
山小啟何勞做由來休王配五行清廟供羞宜夏長大州
獻鱸備堅剛籩人鄭重天官掌請看片片擲風濤喫酒成
龍引千丈

塞上秋熱用王荆公韻

木柴僵落白草摧禾麻殘立如枯骸邪氣襲逆中結轡忍
汗不待七發枚焦頭頗苦張火織炙膚無乃團冰臺大漠
驕陽四千里沙石爛熳如燒灰使者飲泉渴不擇候吏背
血誰矜哀九邊畏官甚於魅豈待荒旱生椎埋我知酷虐
匪天意道逢牛喘猶低回東南更聞厄霖潦憂勤何日堯
眉開太息年時論邊事疏成殿閣涼風來

客心豫爲秋風摧與狐謀裘蘇病骸獨貪避暑勝河朔入
握陰泉珠一枚炎官恐我不耐冷餘威直到單于臺邊人
嘲是帶來熱吾養其內心死灰素琴自理那成操誰和萬
壑松風哀清宵獨立感皓月虛鑑偶著埃霧埋大寒盛暑
諒難久清商勁氣將迢回闕地置冰亦何取方牀八尺琉
璃開趺然無音絕襪襪笑問蠅蚋從何來

和東坡石炭

雷斧擊崖臀股斷防風骨節顛頊骭海國機心鑿竅開怒
鑑飛車恣畔換厚坤富媪蘊陰陽預鞴鮫龍鑪底炭壇升
黑玉鮫有文瀕積青金焰不散西北家家足炊爨周後卅
圖請傳看歐冶薛燭亟物色折蘭盧侯斬銳悍炎炎火山
石可樵錚錚鐵山戈乃鍛漆身黜面人作勞何苦獠奴求

阿段

君不見塞南童土樵采斷樵子號寒衣至斝方筐拾得馬
通歸流人翻取名香換我觀廣莫山宛延上者金銀下瑞
炭單于不知利有孔但逐水草牛羊散土人然石火風腥
夜氣神苗更誰看五千山榮雜代貉莫笑巖頑與石悍人
居未稠地寶闕誰遷程卓業冶鍛鶉鳩斑斑胡桃文貴官
燒木論條段

曼農省余塞上同游雲泉寺爲別用東坡與子由同

游寒溪西山韻

故山菘蕨無一畦全家飄泊軍都西少游下澤合鄉里爲
我長輻濂深泥且尋泉脈洗塵壙村沽不假尊罍攜橫沙
亂水紛到眼但有驚雁無閒鷺積年殘雪尙封竇昨夜急

雨初鳴溪柳不知春況三暑羲輪摧凍聲玻璃嗟我肝脾
伏炎瘴忘歸決占寒巖棲野僧乞句已滿壁藏狸讓窟將
成蹊須眉漸改語音變子勿見追徒慘悽阿奴歸去更碌
碌莫更疏直遭排擠臨分苦語豈浪出懲羹未可疑吹齋
萬羊鞭叱盡成石醒來落月圓如圭

右臂作痛彌月歌以起之

不挽九石弓不撫七絃桐三年曲肱枕北風天生此手竟
何用胡爲拘攣械搨百患來相攻霜蹠小蹶不騰踔病翅
欲舞憐氄氄臂化爲雞窗下語謂此神佑非天窮先生一
抵掌屈橫能爲縱入門俯坐客塵毛奮擲談辨雄但令貴
戚相斂避自攬六轡孤乘驄焉知千夫指爭集短狐暗射
沙濛濛鬼薪折掇白粲春百金無藥龜隆冬茫然四顧一

搖手不得猶且終宵運筆撰說叢及今小休息一節偶罷
全體充酌以忘憂酒導以靈壽筇支離或免役優游歸作
新豐翁不然時來折臂猶三公我聞強起忽狂笑士能截
腕難僂躬長揖將軍信兀傲木材接續今更難爲恭焉能
僕僕走秦楚苦以小體撓心胸君不見張侯矢貫肘枹鼓
嚴軍容國人耳目屬卻克誰知流血輪殷紅又不見子公
凌寒出西域谷永耿育訟其功可憐兩臂不信詘頽唐卧
守邊亭烽人生何者非遭逢吁嗟乎善射射難封善書書
不工柳生冥伯豈必意蹶蹶靜玩物化神行空無官何待
託風痺蠲痾不餌千年松公等誠不能案摩析枝爲長者
吾能挾山超海獨障狂瀾東

晚春

市塵知避俗兀坐玩春深
火燼茶香細書橫竹个陰
惜花生佛意聽雨養詩心
傲吏非真寂虛空喜足音

和夢所居庸九日韻

秋色無南北人心自淺深
毫枯搜獵兔絃靜下歸禽
老守行千里長城亘百尋
駝鈴詩思倦爭似戍樓砦

謫居

清時乘障謫居安六拍悲笳且罷彈
牛血謂能明蔣琬烏頭何惜誓燕丹
短衣離地輿臺笑芒屨循溪父老看
九死孤臣親齧雪恩深未覺塞堦寒

夢所來守宣化過郡話舊賦贈

故人憐我滯刀環乞郡遙臨納款關
久徙略諳田牧利聯吟須放簿書閒
廣延宿士休懸榻便作州民決買山
微有

江湖流落感夢中重侶舊鵷班

漢家九郡競邊功論治終歸長者風平野禾麻新雨後前
朝亭堠夕陽中早知上谷須元伯卻宴南樓憶鄭公逐客
春來萍擲浪暫開襟抱一尊同

自笑

鈍根自笑困陳編經不能神筆未仙鄭學麤通嫌引緯坡
詩細讀癩參禪淵源何取孫王辨門戶眞知洛蜀偏一卷
乍開猶異說固應朝市動紛然

夢所書來盛稱新室之美促余過郡戲成長句

州宅何曾似越中自夸素壁畫圖工祇應布被平津客聊
避弓閭廣莫風木石生雲山氣紫主賓對雪酒顏紅新詩
美政流傳徧便恐虛聲到蓋公

始得伯潛書時築室石鼓山中以詩寄懷

十年同夢躡天梯自屏尊壘急鼓鼙一觸網羅江水闊幾
回書札塞雲迷閒琴獨理龍潛聽裂素難投蠹壞題已是
結鄰乖夙約放歸我亦澗于西

寄高陽師時奉命鄭州行河

舉朝動色議賓河棗野陘成又瓠歌漢使博求中策贅禹
功利導下游多儻遲竹落三旬塞豫怯桃花二月波今日
狂瀾仍隻手兒童走卒歎公皤

釋戍將歸寄謝合肥相國

捐棄明時分所甘無家何處著茅庵便憑黃閣籌生計願
寄滄洲得縱探冰積峨峨幾止北鳶飛跼跼征南負芻
越石嗟枯槁門下虛煩解左驂

別察罕用坡公別黃州韻

邊城誰謂久牽鞵三見修羅翠作幃
司隸漸安長子徙中郎豈分朔方歸
未迴天地空橫耒儘有煙波許拂衣
堪笑癡兒頻數日驚猜赦宥尙疑非

騏突羈縻肯受鞵申椒狼籍恥充幃
屠龍伎倆殫家授射虎功名論贖歸
郊外三年宜以玦牆陰七日感無衣
篋中職貢殘圖在黑水驚湍觸物非

時緬甸已淪
西藏多事

讀樊川集有感

司勳胸臆在孤行浮世傳詩亦強名
仍歲江湖疑中酒幾人霄漢肯論兵
能容兩黨非無術不作三公爲有情
莫舉前身江總例鬢絲心鐵感平生

響水梁

百折終歸海徐之濁亦清如何微搏激便作不平鳴

昌隆寺孤松 寺在角臺山下石頭村

殘經卧佛隱孤峯誰呪飛泉養伏龍手撫蒼官宜作弟道

光二十八年松 樹上懸一旛乃戊申三月九日僧圓定手種

孝達前輩致海南香雷州葛

一穗輕煙雨後山妄心塵夢已全刪蔚宗多事成香傳便

落膏昏甲俗閒

驚雷飛雹起無端五月披裘怯夜闌獨有故人知傲骨葛

衣能敵九邊寒

張楚寶贈肅毅刀乃壬辰德國格魯森廠所製文忠

命其監造者率賦

斂盡中原百勝鋒晚經錘鍊壯軍容昆吾大食終何用神

筆淒涼老折衝

孫吳祕鑰鬱胸中
酷喜張侯有舅風
迴首戟門參語夜
酒闌橫膝論英雄

鮑臨字敦夫浙江山陰人同治甲戌進士改庶吉士授編修歷官司業

和漁笙歲暮卽事元韻

萬物紛紜錄計然
掃除賴有筆如椽
驚聞巷口催年鼓
贏得牀頭押歲錢
好客都歸詩社裏
苦吟閒寄酒鑪邊
明朝記是新春日
影事從教算舊年

吳觀禮字子儁號圭盦仁和人同治辛未進士改庶吉士授編修有圭盦詩錄

陳啟盦曰圭盦之志詩不盡傳後世讀其詩悲其遇耳孰能於翰墨中得其生平所趨向哉

張賈齋曰

伯潛悲圭盒甚日夜思圭盒則取圭盒詩日夜讀之
 日以詩傳圭盒非圭盒志也然其詩則固有足傳者
 在於是舉其有關軍國之大及生平出處交際者斷
 而存之得詩二百七十八篇都為一卷手寫定本
 詩話圭盒負異資潛心經史內行純篤先後娶何子
 貞子敬之女得授書法在左文襄軍中短衣四馬指
 畫陣略積功至道員以目疾辭去赴試成進士入詞
 館典蜀試歸應詔陳言經世之心見於吟詠故多饜
 切事理不淺以才情風格見長歿後張文襄挽以詩
 云識君日淺見君心兩疏憂時壯翰林交遍公卿無
 詭合久更戎馬轉湛深憐才會叫巫咸筮敦舊新調
 子敬琴使府三良同一厄秦川嗚咽隴雲陰原注君
 典蜀試有綿竹楊生高才不遇君深自咎責至於下
 泣謝廖伯前輩病歿君經紀其喪君與廖伯及張兵
 備樹焚皆為恪靖伯薦
 辟入幕期月內並卒

除夕感賦

征衫乍脫綵衣新惆悵歸遲別太頻五日春盤慚侍奉一
 年家計感艱辛即聽爆竹非前度况飲屠蘇少幾人風雪
 殘冬書不達他鄉苦累倚閭親

西征

久鬱從軍志西征氣始豪浮家湘水遠前路華山高將帥
紛旗鼓雲霄見羽毛至尊重推轂多士感同袍舊政宵披
牘新規畫建旄尤思徙薪計大作運糧艘幹濟今無匹忠
清古所褒人才關事業幕府集英髦賤子邀青眼經年佩
錦弢仍爲後車客同飲上流醪弱冠游燕趙炎荒正驛騷
梟碁頻失算鴻澤莽哀嗷慷慨論三戶沈淪厠六曹時還
資戰略豈謂襲戎韜易醒春明夢迴看浙海濤艱危驚厝
火憂憤見徵牢陟岵悲何極離鄉首重搔罪言并酒止羈
隱託禪逃偶作登樓粲遙憐運甓陶爲犧甯未悟嚇鼠信
相遭去病當求艾懲邪務斥蒿狂歌叩牛角寶劍拭鵝膏
出處從容甚親朋問訊勞真無千里馬豈少九方皋吉筮

從鳴鶴飛輪駕巨鼇披襟逢吐哺雅韻續題鮫五嶺氛猶
熾殘冬陣再鏖儘教濡盾墨曾未納鞞刀奏凱期真速旌
庸典濫叨早知平獫狁會且出臨洮老樹從侵雪秋鷹欲
脫絛迢迢沙磧淨獵獵朔風饕歲月爭梭疾英雄付浪淘
奇勛須習膽餘慧薄簪毫審地追新息持心念莫敖何當
裘帶暇更與鼓枹操節度方移鎮書生分屬橐馳驅情勉
勉瞻望思忉忉回首違親舍衝寒泛客舫常吟謝池草待
種武陵桃適楚謀誠善還吳意向諂本支期衍厖嘉會負
彈璩裾忍牽溫嶠詩應報寶酒承歡輕奉檄樂道盍觀濠
母曰酬知遇兒行勿阻撓終非爲雞肋可許挽烏號果慳
平居願奚辭萬里翺將軍矧充國竊據異隗囂能識犬羊
性毋矜羆虎噪徒戎堪實塞興滅效廬漕漢使收天馬周

廷貢旅葵請看長揖去歸橐謝葡萄

感事

甯聞周召制鷹揚拜將登壇重啟行兵柄誰侵天策府元
戎直擬虎賁郎若爲善馭臨淮部可有專征趙郡王多難
豈容矜意氣累朝舊制未應忘

東坡生日集外舅寓齋謹賦

奎宿在天光熊熊千秋文府呼吸通有時降精流玉虹在
宋則生蘇長公文章風骨凌華嵩生當歲寒晚節崇真氣
直煦冰雪融自能壽世包化工當時毀譽浮雲空帝后動
色知公忠撤金蓮炬寵眷隆縱遭遷謫恩遇終身行萬里
明益玃安論磨蝎臨命宮今之坡老爰臂翁平生梗概將
毋同陳笠屐圖拜鞠躬酒脯羅列簋有饌恍陪觴詠黃樓

東語我舊事意態雄鳳臺官閣甥館中詩思斗落如長洪
壽公滿引流霞紅五十年來何怱怱表忠寶墨新磨礪西
冷舊祠肅楹櫺講堂梅雪方溟濛主公祠宇承流風惜疏
薦菊嗟轉蓬庭前瞻拜呼兒童夜分催詩鉢打銅南飛一
鶴聲玲瓏我如子立邀青瞳小草亦倚芝蘭叢玉堂著作
才未充時艱閱歷憂心忡世間榮落胡嗇豐惟三不朽德
言功居今稽古思何窮再拜獻詩公聽聰

與謝舍人

章鋌

論文

震川望溪評遷史誰歟述者後有王蜀輜歸來書滿篋此
本斑駁留丹黃炎雲忽墜雨點白門外車聲動霹靂挾書
剝啄尋幽人共手一編恣探索

舍人索歸方
史記評本

波瀾壯闊疑

忘歸秋鷹欲下盤空飛龍門奇譎不可狀薪火孰與揚餘

輝東坡氣似峻坂駟昌黎古幹無雜花韓蘇閔肆各有得
格判唐宋徒吁嗟亦從精微造眞放江河濁浪紛淘沙才
力由來誇橫絕切理應須透冰雪劉繁方簡姚吐含醉翁
法嗣森成列畫師畫馬論神駿骨肉相包始清穩梅氏猶
稱具體微餘人率借空虛遁中聲要入黃鍾宮二京文菟
羅西東宅心醞粹性靈足博厚期與詩書同千秋義法求
統宗祕旨乃在葫蘆中行無地難且踐迹涉獵子長師扶
風

星斗南

斗南一人大星墜內訌外寇乃馴致帳中自呼星斗南騎
箕天上迴戎驂平生未快屠鯨手力挾豐隆海西走島夷
千載未祠神遂震威靈薦圭卣中奉歷朝天可汗惟一个

臣在廡右寫金教識麟鳳姿覆杯肯饗蒲萄酒漢民掠買
歲幾千惟神護持撫摩久豈無虐死爲鬼雄會當搏噬奮
功狗吁嗟乎男兒生不遑請纓死將叫閻與帝爭不共戴
天甯反兵穢人何物來要盟衆仙排雲孰可使須駿馬監
傅介子龜茲就戮匈奴臣笑斬樓蘭目壯士靈旗旣下犁
韃城視我將星東北指朮赤遺封生虎狼包藏禍心越疆
理神力驅除冰海頭銅柱拓邊還萬里異姓藩開奇渥温
世扞牧圉承皇恩聲教四訖彌海垠一洗諸派婆羅門神
兮歸來配烝祔丹青自有凌煙閣

蜀兩生行

石城山頂窺峨眉胚胎靈秀爭幽奇岷源水入錦江碧奔
流到海無盡時兩生生長山水窟合有清氣相扶持我知

兩生名初未識兩生五色動眸子雙璧誇連城青鸞鍛羽
大鵬息黃金之臺高不極有才自與歲月深里閤何殊在
京國但令每飯念宵衣莫辭三載聊家食炎曦暵人行路
難十旬羈滯猶長安長安冠蓋富豪俊事賢友仁良所歡
喬生好客肝腸熱門限將穿眼森鐵與人媿媿不忘規言
泉噴落離堆雪毛生廣坐兀徘徊階如石筍撐寒梅閉門
頌酒自孤枕夢吞溟渤杯中來一滄一煦頗殊致兩人測
交敦古誼攜手同行胡弗徐投詩話別憂時事九州饑饉
流民多況聞苦旱家書至熒惑搖芒室壁間仰視太陽麗
天駟斗車憑戴筐騎衛信環侍霧凇升降豈有徵榆桂參
差且循次汝今涕泣悲路歧我剩淒涼已無淚望雲羨汝
共言歸坐令兀兀吾心醉不敢尊沓矜談天爲汝少損摩

兜韃殷憂啟聖蹇疇昔先帝中興方冲年采芑江漢鞠師
旅騶虞麟趾依親賢拊膺玉几迭霜露天荒地老愁神仙
宣仁堯舜終乾乾所嗟中外多備員及今英劭爲時出奮
發猶可追先鞭行矣各自愛劍氣騰星躔願友天下士更
攬形勢全南下吳淞叫精衛西入夔巫號杜鵑山澤崇朝
有霖雨畎畝要在能力肩余生早衰盼雙杖道逢叩竹煩
留連

將乞歸示同志

別離在俄頃一刻逾千金茫茫百端集匪獨悲牙琴白日
自天上浮雲且勿侵神仙諒虛語忠孝珍素心但恐同志
少終苦力弗任掉頭已巢父淮南秋漸深不見空中書祖
筵酒重斟酒酣論古事涕淚沾衣襟圯上一謀面赤松何

日尋僧寮芋初熟未解長源簪炊梁不就枕息羽甯入林
歲月積薪暇陟屺思故岑睠言審出處所願加砭鍼踟躕
乞片語坐右以爲箴

緣陰

廿年陳迹杳難尋回首人天幾緣陰自歎吾衰情頓減宵
來夢阻桂花深

陸廷黻字已雲號漁笙鄞縣人同治辛未進士改庶吉
士授編修有鎮亭山房詩集

次韻毛溪芷

琅

別後見贈

相逢且漫訊頻頻多恐容顏審未真亂後餘生猶剩我尊
前朋輩更何人傳家尙有青氈在歷劫惟添白髮新對坐
殘鐙無一語不堪淚落已盈巾

李問樵明府 裕澤 招同陶子方前輩 模 孔培生太守

廣稷 暨楊心裁 培之 姚仲容 貞 兩大令飲城南曹

氏園

飛蓋出重闔咫尺城南園丹甍隱林薄高館抗層巒藤架
環曲櫺槿籬繚疏垣開芳異金谷野花何爛漫 平 躡梯緣
石磴曠焉俯平原浮雲斂野色天地為之寬置身百尺上
憑風修羽翰

明府敬愛客選勝開瓊筵醜酒漉桑落盤列河魚鮮朱華
夾綺席綠茵鋪茸氈愛此園林景長日堪流連座客盡時
彥才藻紛聯翩陶侃勤運甕尤稱當世賢

邊城五六月炎威殊未逼微雨從東來雲氣黑如墨皋蘭
與五泉對面失山色吾與二三子游宦共一域於君雖新

知乃如舊相識今日良宴會歡樂詎有極安知轉瞬間分
轍不南北杲杲方出日其雨自難測聚處卽有常百年亦
頃刻相期千載後及時各努力

錢清道中

向晚山陰道扁舟一棹橫歸雲栖樹在明月逐波生何以
景芳躅因之寄遠情瀾瀾江上水千載有餘清

愛伯贈詩有國事艱難正乏才句重感其意疊韻誌

愧

鮎魚依舊上竿來誰許滄溟跋浪開已判沈沙埋折戟那
能餘瀝乞分杯楚囚空灑新亭淚櫟社終非大厦才徑欲
拂衣從賀老鑑湖一碧淨無埃

次韻和雲門同介唐酒後過敦夫寓齋

蘭若翡翠鬪新鮮酒後新詩寫滿箋竹屋一燈人擾擾梅
窗半月夜娟娟我曹狂飲能千古此夕清談足百年莫被
市人知此態買絲恐作畫圖傳

陳寶字百生東臺人同治辛未進士改庶吉士授檢討

有陳百生遺集

詩話百生遭逢兵革以孝廉從軍詩初學吳野人及
參戎幕多言時事其軍行雜詠語皆紀實爲時傳誦

軍行雜詠

蒐材於覆軍得士豈能勇紛紛下第人輦下聚秋蠓長安
非我家道路正洶洶對酒思貂裘將車愁鐵籠開門一客
至下馬干言涌要我孱夫筆佐彼軍事冗我方嗒焉喪聞
言三曲踊走告王策丞與錢辛伯壯語相慇懃亦有尼行
者囁囁兒女恐人生取快意失蜀匪望隴儒冠裹人頭終

古繭居蛹捲書市鞍轡僮僕日夜董偕行有三子通名交
揖拱同是罷耗身相看一笑嗒

中州一公子言事忤當軸京朝久閒冗閱世屢蒿目一朝
動感慨屏人書奏牘上言壘在郊主憂臣乃辱中言賊未
殄先臣死猶哭下言諸將帥往往舊部曲願借一尺捶聯
之若轡轆庶幾挽天河救燎增一掬用酬累世恩亦爲先
臣告溫詔下中樞祖筵集華轂急裝辭國門如笱斯赴鵠
王臣則匪躬父書豈徒讀

西捻從西來陝西及山西長驅不留行躡我燕趙齊析津
國南門到此迴妖旗句河而股海運河實弦之區中卅餘
邑馬足縱橫馳千里斷郵報擊柝聞王畿宮中三聖人日
旰憂烝黎禁旅屯近郊火器升城陣五城興團防列肆謹

所譏三方既命將十道猶徵師防勦各有職廓清常指期
廟謨豈操切威克今所宜亟當洗赤縣然後靖四陲

日落車班班言至趙北口連延十二橋一綫穿巨藪滹沱
衆流匯畿南北樞紐關門得虎豹可以一夫守我聞南方
兵臂金纏到肘旗兵一何貧懸鶉結衣縉荷戈有菜色翻
緣酣豢久戰陣固未經豈足威戎醜居重以馭輕此語慎
非偶濛濛帆入煙戢戢魚在笱使者自斷飲爲客設村酒
我欲訊形勢浦上進漁叟

飲馬涉河水水深當馬膝土團練未堅周垣築甫畢千里
列防戍豈能寸寸密以我晨星稀當彼飄風疾擣虛猝莫
禦走險逝何及此賊固天亡翱翔未思出養癰慮終決執
尾憂驟失握竒有競綵沈思耿中夕

聞昔咸豐初有賊林鳳祥名王仗天戈擣之於高唐爾後
十餘載未見兵塵揚去年任與賴隔此河之陽茲土非上
腴頗亦能耕桑棗實大如卵稊稈高於牆朝墟趁煙火夕
野牧牛羊賊至鷹集抄兵來烏鳶翔兵賊互傳舍游散生
蟲蝗婦稚豈可問雞犬盡已殃流人哭暑雨殘尸官道旁
皆緣屯堡廢緩急難逃藏堅壁與清野先病誰儲方所以
將帥武不若司牧良

剛鐵截作筒柔鉛煮成豆陰火孕蛇腹神機啄鳥喙爭長
軼弓弩命中洞介冑茲器識利用夷舶重金購初止一夫
敵把玩祕懷袖近日堂堂師每配千萬副他兵一時廢步
伐亦夷授鬼方初猾夏肇釁在卮漏神州比多故乘時逞
踐蹂上賴九廟靈西契不復嗾蚩尤至今日制器亦云富

戎心未可啟慎勿示之陋

得官須得印握刀須握柄鞭好馬亦驕箭長弓始勁面諛
多背憎貌讓乃心競小水喫不得逆風呼豈應六轡在人
手安能工縱磬

繫馬在深闔剖箱爲之槽追雞忽踏瓦擊豕先趨牢瓶盞
盡翻倒窗櫺便摧燒比舍破斧聲誓不遺秋毫醉飽發高
唱裸卧紛爬搔一婦牽出窖爭先起羣囂老冤方惴惴執
爨供芻菱齊俗固强悍吞恨烏能消每值單騎過或伺中
途要驅來授畚鍤臨穴無一逃所報或匪讐玉石軀命渚
仇殺迭相尋將怒兵能挑昨日長平坑今日阿房焦
流潦不可止師進隄石橋萬馬行淖中疲蹶不能驕我身
豕負塗聊作強蟲跳雨過日在頂蘊隆蒸髮毛下馬不夕

食坐甲猶終宵昨者捷書至軍聲爲之高封羊豈不易預
在扁其牢羣帥利所獲紛紛探轂巢莫肯分偏師留俟半
涉要坐令出柙者假息猶魚然書生亦咄咄健劍須橫腰
雷鍾德字仲宣安康人同治辛未進士改庶吉士授編

修歷官成都知府四川候補道有晚香堂詩存

詩話仲宣官詞曹不得意改官蜀中頗有政聲耽吟詠清剛雋上不失關中老輩遺風非苟作者

九日陶然亭讌集

帝城風物漸凋摧佳節登臨此舉杯日月久淹京國夢亭
臺還共酒人來海門潮落津雲白碣石霜寒塞雁哀一眺
五雲最高處鬱蔥佳氣滿蓬萊

吳柳堂侍御輓詩

痛哭 先皇帝恩容折檻臣餘生抱肝膽趨死犯沙塵黃

鳥哀無極蒼龍意可親
精魂不歸去夜夜鼎湖濱
弓劍虛遺器謳歌自野人
今皇倫誼重微悃血書新
鐵券留千古山陵泣百神
蒼涼遺疏在寢樹不勝春

改官出都留別館閣舊交

萬懷鬱勃紙難宣
去國心情更惘然
鳳閣文章原小謫
龍樓日月正高懸
時清漫發平邊策
詩健能吟出塞篇
九萬里程今此始
平生誰信少游賢

歐蘇作吏風塵久
都是玉堂揮翰家
官職豈能軒輊士
人生無定溷茵花
岸巾氣滿安西座
攬轡風生孟博車
珍重明時強餐飯
同袍才俊各天涯

成都雜詩

英雄躍馬終何事
帝子風流久寂寥
豈有江山容草竊
可

憐歌舞總煙消天邊杜宇嗁殘血江上芙蓉咽暮潮終古
西南形勝在惠陵松檜自蕭蕭

森森翠柏錦官春丞相英靈亙古新名士風雲關氣數亂
時魚水幾君臣星沈大野天何意潮轉空江石有神獨對
斜陽弔先哲西風吹淚滿衣塵

初至涪州

江漲夜多雨秋深天尙溫峽猿吟到曉沙鳥語當門巫鼓
迎神曲村歌勸世言蠻方盛鬼魅日日只招魂

登樓

倚劍崆峒夢已沈高秋風物試登臨東流浩浩西江水南
雁年年北客心微雨烏歸蕭寺宿落帆猿傍楚船吟風雲
滿眼知何兆獨倚欄干看夕林

憶舊

長安門外散直歸柳花如雪春亂飛聯鑣接騎酒家樓五
侯鯖膳郎官杯中翻出霓裳譜紫玉紅牙妙歌舞酒闌
曲罷不歸去莫愁門巷正春雨

夜半大雪呼鞍馬臂弓腰箭陰山下射得雙雕落馬頭平
明歸衙鼓猶打邊城九月沙草黃大罽行酒炙黃羊一聲
哀笛山石裂喚取羌兒唱伊涼

羅大佑字穀臣江西德化人同治辛未進士歷官臺灣

知府有粟園詩鈔

詩話穀臣以甲科屢宰劇縣權臺南郡守遭疾十日而殂囊橐蕭然遺詩一卷門人林有慶爲付剞劂唐薇卿稱爲學人之詩寢饋唐宋大家非塗澤金粉可比

月夜溪橋散步

皎月自東升光照千山晝長橋躡飛空倒影瀉奔溜寒潭
淨泥沙巖崩石骨瘦波痕浸虛白表裏盡通透幽人一散
步惜此光明候萬籟浩無聲木末巖風逗數舟依淺瀨明
滅鐙如豆欲去聞清謳餘響入遙岫

夜靜羣動收百物同一息逝者如斯夫奔流無停刻如彼
明月光西沒復東出昭昭河漢間不礙蟾蜍蝕一元運終
始偉哉造物力水亦長無盡月亦永無極流觀宇宙內外
理尋可得仰首視高天萬古青蒼色

舟泛彭蠡

疊浪浮終古中流混太清地吞章貢闊天入楚吳平薄宦
常爲客孤槎又遠征匡君招手語去住總關情

登樓贈畿臣

山城木落亂蟬秋
劍水嵯峨擁石流
遠道涼風催塞雁
極天詩興落沙鷗
一官浮世笑五斗
與子提壺銷百憂
聊話廿年刀劍事
暮雲吹角向夔州

春情

柳條漾碧草毵毵
蝶妥鶯捎花氣酣
斜立熏籠溫睡鴨
綺窗無語夢江南

曉風紫陌嫩晴天
杏子衫輕乍換綿
似向石家樓畔醉
綠珠花底試秋千

讀山谷集

高巖插天石籠篴
飛瀑薄石孤根動
金眸蒼鷹立突兀
摩空瞥擊毛禽恐
雙井水煮雲腴茶
肝肺竹木森杼杓
取琴再彈亢以節
頓洗人世千箏瑟

汪昌字詠之吳縣人同治辛未進士官德清知縣有退

思居集

擬結客少年場

輕裘披鷓鴣寶劍佩干將徵逐長安道酣飲集壺觴
伯歌金谷伎較獵羽林郎相期在意氣一諾千金黃
不知有朱郭遑論金與張日月曾幾何朱顏變老
蒼悉數平生友各在天一方悔不早努力老大徒悲傷

邊淪慈字雲航任邱人同治辛未進士官寶豐知縣有

霽虹樓集

感事

飄泊無歸計羈孤有世官貧緣求仕早卑覺立身難
澤尙綿三世才誰授兩餐榮衰如轉轂豈獨晉原樂

車服成虛器當陽落太阿貴非王者馭官比盛時多易捧
毛生檄何勞甯戚歌但愁銘隧日書績奈卿何
糟粕空方策屠沽有壯圖白頭仍誦讀赤手已公孤說劍
神俱王當歌氣益麤果能開絕漠漢將起人奴

各上下

擬張司業各東西

飛鳥翔一下復一上平生棲宿同一枝咫尺遭逢判霄壤
青天白日搶枋榆稻梁易得身不孤嚶嚶求友鳴相呼卑
枝刷羽低將雛仰視雲端去如箭毛羽初豐未能健六翮
搏風掄畢羅長空一落何由見天闕沈沈暗不開梯雲何
處望蓬萊神龍墮地不如蚓何似泥中睡得穩

嚴玉森字鹿溪一字六希號虛閣儀徵人同治癸酉舉

人官戶部主事有虛閣遺藁

詩話六希才氣豪邁憤世嫉俗初從許海秋游京師人皆目爲狂生後與李蕤客張叔憲交蕤客詩所謂嚴生本畸行者也四十四歲游洞庭盡擲其詩文雜著於湖今所存橐僅十二三已而喪明所作皆人代書

客話太白武功之勝因懷康對山修撰

海

忽急友難游瑾門琵琶不以遷高官死餘大小鼓三百絕
世風流天地存今日游公鄉昔日登公山揚州豔說修撰
好要知公之氣誼山河尊華山不爲高黃河不爲深公平
奇節超崑崙文章絲竹偶然耳後生小子之論何紛紛丈
夫不作王右丞清流第一申屠蟠三秦豪傑誰景略但見
涇渭水合流渾渾潼關望中條司空詩境愁雲屯坐客談
武功太白之雪緜秋春清泉白石忘寒溫商雒深山多隱
淪螻蛄朝菌恩恩甚怪柏寒松愛避人

由衡嶽南臺寺歷玉版橋至半雲菴後山謁庭柏禪

師墓還至田家醉書

入山復十里積翠交萬重曾經太華險履此能從容霞外
鵠影微霽初雪意慵薄薄田舍酒疏疏遠寺鐘泉汲思中
冷樵衲來上封鄉夢蕪一絲春錦花千峰萬類共悲喜孤
筠觀淡濃茲游任醒醉箕穎懷前蹤

可園獨游梅花盛開

文襄文誠去已遠嵩雲衡雲來作花疎籬密護斷人跡鐵
骨橫空羣鳥嗟當年觴詠倏泡影天山劍戟今桑麻此花
閱世將二紀冷極無言聽晚鴉衡山雪薄梅亦少泉根幾
樹微煙遮炎荒孤賞抱冰雪乾坤一氣春萌芽可園人散
爾清寂空廓不斷新雲霞夜深脈脈來鶴語門外時時喧

馬搗湘上何人吟水涯黃河西北無悲笳繞花千轉傷心
極白髮寺門長種瓜

陳允頤字養源武進人同治癸酉舉人歷官浙江杭嘉
湖道有蘭墅詩存

錫蘭古寺作

談何容易到西天入手欣繙貝葉篇龍漢劫餘開世界鴻
泥印徧悟因緣青鸞一去無消息白馬重來有歲年塵海
茫茫情海竭回頭我亦欲逃禪

東游

言旋歐土甫經年忽漫浮槎到日邊濯足滄溟驚海若縱
眸寰宇渺齊煙秋津浩蕩疑無地富嶽恢奇別有天南望
中山北平壤我思王會一怦然

鷗夢樓卽席敬步節使原韻

夕照銜山月上天煙波極目思悠然士從魏晉多於鯽詩
到齊梁噪等蟬澄景漾成干尺練秋聲迸入四條絃不知
何似南樓宴其事其人要可傳

彭祖潤字岱霖長洲人同治癸酉舉人歷官浙江候補
道有玉屏山館詩草

蜃樓歌

東海微明日將出水天渺渺昏曉割輕舟機軸鏡中行疾
如飛鳥來空闊瞥見長城雉堞堆千門萬戶洞然開六街
擾擾隔煙霧人影憧憧往復來樓閣玲瓏半隱現分明閭
闔開宮殿雲母明窗扇扇排捲簾紅袖窺眞面觚棱鐵馬
迎風鳴彷彿漏聲催曉箭無何華屋變長林萬幹千株罨

綠陰柳浪欲迷么鳳采松濤還瀉老龍吟忽然變幻成巖
壑瑰奇宛似五丁鑿森森石筍撐青冥朵朵芙蓉懸碧落
迷離恍惚心忡忡人間世變將無同大千形質終消滅惟
有滔滔流不窮

庚辰六月入都重過舊第有感

萍蹤飄泊幾經春老屋重過倍愴神自種梅花已如客慣
來燕子尙窺人紅塵依舊嘶驄馬綠野蒼涼卧石麟二十
餘年歌哭地不堪回首話前因

周炳蔚字升華號虎如靈川人同治癸酉舉人歷官直

隸補用道有川明書屋詩鈔

臨肅五弟以雨後江亭遠眺詩見示卽次元韻

快磨濃墨寫時晴飛到鸞牋老眼明
廷尉山頭新世說史

官柱下舊家聲北窗我願師陶令前席人當問賈生聞道
鄉評高月旦難容葛亮久躬耕

孟繼堯字志青天津人同治癸酉舉人由內閣中書歷

官湖北鹽法道有綠莊嚴館詩存

詩話志青同官京朝相與過從朝鮮使者李鎬翼陶
隱沈琦澤雲稼來京師游讌唱酬頗極一時之盛志
青旋出守石阡邊郡簡僻以詩詞自遣尋遷觀察武昌未幾即卒於官

石阡雜興

幾樹修梧蔭碧天時閒一到訟庭前報衙吏少民無事喜
雨人多歲有年橘柚送香花作瘴椽欄如扇葉搖煙小山
直上平於砥助我登臨聽響泉
滿城桃李萬千枝如此風光可入詩卷耳徧生新雨後畫
眉偏叫落花時蘼芽空谷無人問莎草橫塘有夢知更喜

園林消夏處一枝香玉放山梳

唐贊袞字韡之善化人同治癸酉舉人歷官臺南知府

有鄂不齋集

蝶夢園

漳州李正青明季依鄭成功居臺灣當魁斗山為園號蝶夢

門迎魁斗美人鄉寂寞園亭冷夕陽一枕陶然誰喚覺蘧

蘧為蝶忽為莊

殘碑鬼物尙搗呵中有高人隱薜蘿化蝶尋秋香入夢感

時花濺淚痕多

何延慶字善伯江甯人同治癸酉舉人歷官知府有寄

漚詩文集

詩話善伯於學多所涉尤務讀有用書少作多感憤
薛時雨題其集謂此腔皆熱血所至發哀吟者也時
與顧雲陳作霖鄧嘉緝秦際唐
蔣師轍朱紹頤號為石城七子

夜靜

夜靜疏星落山深冷雨懸浮雲如客倦寒月逼人眠性命
憐知己功名負少年那堪成老大終歲警烽煙

松江老兵行

松江老兵八十四爲我追述 純皇事 純皇當日眞聖
神十全武功古無二是時老兵年二十軍中轉戰稱無敵
功成不居歸江南馬稍由來推第一歸來自幸身猶在同
我太平六十載已見年來武備荒難將曩日雄心改一朝
妖燄擾雲間老兵談笑麾金鞭如此逆賊眞鼠輩誓與此
賊不共天百戰不輸一戰負老兵向前衆兵後末路英雄
不自由無端罰作城門守上海城門當衝要微秩居然尙
游徼執挺門前大聲呼是何意態亦可笑自憐少小本豪

英老去淒涼百感生疇昔彎弧誇偉略今來擊柝博微名
老兵言罷吞聲泣予亦停車爲悵悵老兵老兵爾勿悲我
有一言君聽之君不見戰國侯嬴能酬知晚監夷門人所
思又不見西漢梅福辭北闕爲吳門卒猶盡職古來賢豪
不得志往往蕭條屈下位君生不作李西平猶幸身作灞
橋尉峩峩城門冠蓋多賈胡碧眼無譏呵窮途有客歸不
得盱衡厲色君則那歸鴉點點斜陽暮老兵無語入城去
秋色蕭疏古道寒一鞭直指松江路

舟行偶成

古人入鄰疆其識在覘國新牆卑故牆謂其民力竭我昨
至蕪湖高樓半天矗市廛何繁富所陳皆異物轉舟至甯
太曲折凡三日瓦屋無一椽鶉衣多百結嗟我耕作儔略

似溝中瘠昇平三十年無旱乾水溢元氣應早蘇民窮胡
此極此故人知之未語先歎息土貨百不行利盡他人得
鴉片徧閭閻其害爲尤劇萬方胥一概偏隅更何說其榮
在毛髮其瘁在筋骨卽有倉扁來望之神先奪借問醫國
手何以挽斯劫作歌諗有位采風慎勿輟

葉大莊字臨恭號損軒閩縣人同治癸酉舉人歷官邳

州知州有寫經齋初稟續稟

詩話損軒曾官薇垣中歲家居與陳茂庵太傅龔謩
人方伯陳木庵大令以詩相切劇酬唱幾無虛日筮
仕江南張文襄移節兩江招入幕府詩名益著生平
服膺樊榭故句律皆研鍊刻琢絕無甜俗語犯其筆
端

石壁客店

眾峽東迴溪風湍互跳旋嶄嶄斗絕壁綠削缺瓜面單椒

聳干尋秋色麗丹絢磯底伏潛流琮瑋聲一片羊腸在其
上宵窳祇如綫客店懸崖孤居停信云善竹鐙酌新篔簹
染到詩硯昨雨今初晴舟行路尤便下灘不用篙上灘不
用緯十里方廣巖廿里永福縣

巖灘舟中

桐君留客三日雨我愛晚晴更韶嫵紅霞翠靄光有無一
峯缺處一峯補林迴路轉兩崖高下有白石細可數有時
峯峯竦對峙白者是雲碧是樹下灘舟語上灘舟今夜鷓
鴒源裏住蘭溪女兒船爲家越州美酒杭州花行行且止
瀧七里一月渠儂在瀧裏蘭溪女兒慣如此

芸敏同居法源寺累月初夏余先出都作此爲別

四月南風雨新霽麥花初飛柳條曳短衣匹馬走關河回

首觚棱在天際故人落落金閨彥橫槩論才雄一世手校
華林七錄書石渠輪筆先承制國家右文邁前古漢學經
生持絕詣曠代承明著作家盧錢王紀今誰繼佛樓鐙光
暗高樹日日繩牀坐談藝詩派商量摘句圖碑林校證題
名例明知春盡將首塗強爲藤花三日憩吾窮去矣固其
所斷翮湖天叫悽戾君胡亦復厭長安金爵月明愴分袂
無田棲棲安得歸不飲兀兀甚於涕帛槌茶磨清江居自
醲社錢作春祭早晚題詩寄水莊儀禺絕憶我家弟潦倒
殘吟冷醉身寥天海氣吹妖蜮

叔伊寓高昌廟過訪貽詩疊韻

縣廳決事返便睡魚菜何以娛嘉賓淋浪密雨響窗格寒
禽叫水湖亭濬衝泥巷南越巷北談碑校藝今無倫枇杷

初黃芍藥老香車大道馳麟輅名姬論錢值千萬貧嫁厮
養尋常人東風捲地不動塵華燈顧曲櫻桃唇馬蹏不到
人跡少君家獨樹柴門春諸郎讀書墨滿案瘦句喜作無
病呻手搜女真蒙古事字仿劉懿兼刁遵繫予忍飢困州
邑烏帽雪鬢常參晨行將投劾去踈髮衣囊漁具荒江濱
外集論詩記甲子內景受道持庚申漫承桂段曲爲比一
脈家法真斷斷浚澁令長定何職中天萬古雙嶙峋

崔家莊

任是倪黃意境殊林枯篠禿畫來無嶽光含雪迎班馬河
響捎風叫老烏人近聖居孤學抱天闕魯望衆靈趨雲端
咫尺登封境刺促行程但首塗

秋盡從文山歸過開化禪院

曉晴雜詩卷一百一十五
葦白吹花上竹林霜澱湖水夜寒深亂山遙看孤帆去野
寺閒攜短策尋農歉稻香傷夏潦僧愆茶話賞秋陰不煩
俯仰論陳跡緊記風光恰在心

改庵再約游聽水齋六月十八日往憩半山亭作

書至先將出峽聞僧云到寺夜初分棲遲佛地緣何密版
築山齋績太勤堅坐願聽無盡雨孤行似逐不歸雲盤陀
祇合吾儕據牽率誰期竟及君

水退改庵拏舟往視

傳呼有客泛輕航熟眼村翁識侍郎一漲望衡知共視兩
家插架喜無妨雨來不已吟坡老水大如斯過子桑卻與
山中添故實吾廬受凍屬尋常

春雨閒居招俶玉

滿山寒雨杜門居睡到無聊起校書人日草堂題句後玉
壺茅屋買春初李花綻白梅相似菜甲含黃柳不如出郭
風光君愛否總期發興賃籃輿

陽羨道中

路入漁洋詩句中銅官射鴨竹枝弓落鐙門巷家家雨襍
被江程夜夜風似雪溪光成罨畫方春花信在空濛忍寒
來訪靈雛拍滿意填詞作寓公

桐江舟中漫成寄蘭溪補堂明府

水遠山平去路長夢殘擁被曉天涼平生聽徧江南艣第
一關心是富陽

李超瓊字紫璫一字惕夫合江人同治癸酉舉人官長
洲知縣有石船居古今體詩贖橐

詩話紫瑣西蜀雋才久令吳中以衛民生懲薄俗爲
治造就人材甚多其詩工力深穩亦饒風致不爲同
時諸家宗派所掩贖橐二十卷
一官一集固晚季之英流也

巫山縣

小縣千峯底重闌百仞顛連橋巖作路入笕雪成泉暮靄
從江上春燈共斗懸不聞神女珮新月正娟娟

元夕舟抵宜昌

至喜亭邊水勢平江山開展落颿輕靈旗暮雨湘纍廟火
樹銀花步闌城客夢祇循魚腹上灘聲還爲虎牙驚楚天
寥落鄉音少愁對元宵大月明

昨聞

昨聞瓠子動悲歌槌竹淇園正塞河大澤魚龍爭北徙中
原鴻雁漸南過通渠六輔兒寬少平世三公蔡廓多千萬

金錢休太息卅年填海更如何

正月二十日由楓橋至五淥涇用東坡是日女王城

詩韻

朝來輕棹過齊門踏徧湖東水上村春釀餘寒風有力雪
經微雨地無痕櫂聲此日千家肅時察視保甲先令民家寘一柳無梗令者葑
屋何時五袴溫野岸梅花如舊約停撈香便引詩魂

秋懷用東坡韻

秋風有寒意所憂在農時苦雨日以至吳棉摧可悲藤軒
積陰黯溼暈生書帷老榦若梯磴靜夜騰鼯狸可憐雙鵲
來不敢棲蚪枝腐草知多少爲螢爭飛追微明亟自炫遑
計霜雪期霜雪豈有擇無爲長嗟咨木葉倏已脫松柏彫
總遲

昨宵聲喧厖捲地走飛雨淒切傍枕鳴亦有孤蛩語似訴
窮黎心今夕愁敗堵茅屋破且頽邊論滴漏苦不識濱湖
田誰能捍禾黍三吳亟水利宣洩匯黃浦胡爲三日霖遂
使憂百畝蛩兮爾毋然會見晴光吐

病餘

病餘未損是詩心鏡裏添多白髮侵香繞碧簾盤古篆樹
留綠葉護秋陰年華如水消沈易時事關懷感慨深聞道
東征軍大潰驚呼三歎自愁吟

寓言一首讞獄丹徒感事而作

治民不恃法寬猛施貴當愛民不在迹煦嫗禍轉釀蚩愚
亦何知意溢情易放可親不可褻實惠恆相忘昔聞西鄰
叟容容具雅量出見同巷兒果餌必分饒一朝餽未周面

詬來无妄又聞東鄰媪愛子情益益方深舐犢懷已見食
鳥狀優容既養姦濫予亦叢謗昨來案爰書皆裂難曲諒
靜思蠹爾徒誰使恣凶抗百錢害所基駢首良悲愴所以
鄭大夫火烈稱良相寓言卽自箴小惠安足尙

張清瀚字文瀾平湖人同治癸酉舉人官分宜知縣有
傳經精舍詩鈔

和徐花農太史迎秋詩韻

西浙才名久冠時趨朝待漏隔花遲庭梧一葉涼先遞窗
竹千竿暑未知生面特開摩詰筆秋心合賦少陵詩長天
領略清華景猶記吳山折桂枝

莫炳湘字覲廷湘陰人同治癸酉舉人官如皋知縣有
莫大令遺藁

新秋游冶山竹居晚歸

攜得新茶竹裏煎
晚歸踏破小橋煙
一鑑紅出蟲聲外
萬木黃從雁影邊
月落漸昏鄰院樹
鐘殘猶到隔江船
懸知坐待癡兒女
欲遣僮迎正未眠

劉大受字紹庭侯官人同治癸酉舉人江西候補知縣

詩話寶應王文勤撫閩仿阮文達西湖話經精舍建致用堂課士所選高材生有張鐵君侍郎吳逸亭學博紹庭亦其一也修文赴召未及中年論者惜之遺藁亦散佚不全可錄者不及百篇

登古吹臺

旅居復如何朔氣忽已至
悠悠出門去杖策隨所憩
闔都掠眼過平野迴舒轡
驚蓬多風沙雜樹失青翠
我來正長夏單衣猶在笥
今茲還幾時踐此霜雪地
歲月去浩蕩身世怒如醉
離憂能傷人徜徉聊自恣

振衣躡層臺游心肆遠矚阡陌遞回互川原洞相屬曠野
黃塵飛白日淡無旭閉關伏空案生事常碌碌憑高一瞻
眺始覺羈意足寒雲何層層中有南飛鵠安得附書去道
我心中曲顧影忽不見觀望空躑躅

嘆喑吟

北方苦旱南苦雨天傾地缺誰能補幽州五月塵塞空麥
苗一寸不出土誰知南中夏潦發龍鼉登堂魚窺宇四十
年來又見之熊兵橋東水丈五入春以來常苦霖十日不
得兩日晴吳棉著身夏不脫高堂習習清風生連城鮭菜
已無種況乃泛濫妨深耕中宵忽報雙江溢頃刻巨浪排
山立驚沙大石隨潮至萬戶千村捲蓬疾亂流作勢向城
來七城黯黯晝不開疾雷一聲破空下三條九劇聲號哀

垣墉雜還任摧倒白骨死葬洪濤堆我家城西當水頭水
高過人人上樓大牆如山向我傾危樓黠戛亦有聲老人
呼天稚子哭頃刻性命成漂騰越牆結筏衝波出此身但
存他何恤烈風三日水歸壑沈沈萬竈炊煙息回家甕盎
百不完老屋半敝猶未圻我時游梁方病暑石銚調湯手
自煮僕夫言有尺書來開緘手顫不得語安全百口自天
幸蕭條四壁奈何許一身俯仰宇宙窄高堂闕絕關山阻
人生百年無事無憂患相煎何太苦

後嘆喑吟

生不必荆吳九州陌華騶橫路交霜戟亦不必河陽十里
圍珠簾錦障圍春暄胡爲狝膏棘軸走四海乃不抗首歸
柴門浮雲萬變渺難執但見日月催晨昏故鄉亦未歸舊

事不可論憶我未墜地大父已作吏作吏三十年還家舊
物惟青氈吁嗟先君我未面北堂有母傳遺編寒宵篝火
課我讀有時淚下如迸泉大父歸來時我年已長成我母
望我長我長乃復遠徂征栖遲兩射金門策飄零更作梁
園客梁園日晚西風急沙塵蹴天窗牖黑九衢車馬去如
織覲面相逢不相識黃河之水滾滾東南流客子有家歸
不得中夜孤吟起太息家貧潔養干微祿何曾盜得太倉
五斗粟半管毛錐殘欲禿恩恩走路歧惻惻身上衣重闈
念我心傷悲目斷直北征鴻飛腐儒刺促天所嗤明年更
索長安米嗚呼蒼天何不且使朔飽侏儒飢

楊郎山夜泊卽事

雲陣欲東下急風爭向南精靈戰雷電鮫鱷拔秋潭斷港

羣舟拜中流大浪酣艱虞更留滯水宿況真諧

江行雜作

深冬未遣放嚴霜陽月江行似瘴鄉雨接日光雲斷續秋
留樹色葉青黃煙容醉眼翻宜睡晝景閒吟轉覺長舟子
落帆祀神福還呼僮僕泛杯觴

遣悶

肯勞七尺易浮名聊借遺文遣此生大地雲煙隨百變閒
居歲月自多情評論史案蕭何律推廓詞場黃帝兵長日
消磨真不惡悲秋奚事歎無成

步小西湖有懷黃丈石城欣園曾子幼荃家兄旭初
舊游成夢杳難追獨自閒吟獨自回十里湖隄霜信老牆
頭肥透隔年梅

郭福衡字友松婁縣人同治癸酉舉人

詩話友松性不羈才氣橫溢下筆數言立就書畫
並入逸品鄉里傳其軼事頗近袁白燕然內行甚篤
去取介然不苟

澗山烈女亭銀杏樹歌

槎枒老樹高參天行人道左足不前八角荒亭映斜日四
山列障團寒煙嗚鳥聲語何苦生年偏值單門戶驀地
風波欲斷魂要將一死傳千古姓氏鄰家戒莫談靈風拂
拂餘香龕祇贖秋來幾株樹紛紛黃葉盈茅庵山亭突兀
半椽倒剔蘚捫碑字完好冢畔原生連理枝牆陰莫問西
鄰棗女有靈時樹不枯女所瘞處山不孤蹤跡流芳鮮綽
楔表揚實事傳江湖樹本生苔籬插椽似同處士含孤憤
佳果眞羞產白衣新裝奚必調紅粉竭來山麓作清游十

景流傳一一搜默對靈脩詆剛直朔風狂欲號松楸此樹
生成忘歲月餘杯酌罷拂衣出聞道青溪有小姑雲車風
馬無相失

吳繡虎字穎士嘉善人同治癸酉舉人有轅下吟

冷泉亭

危峯勢欲壓凜乎不可升峭然一石壁獨立當峻嶒衆緣
靜於水空亭客語磨立久我欲去打包來一僧

秦樹敏字秋伊號娛園會稽人同治癸酉舉人有娛園
詩橐

柳姑祠

春風祠樹噪靈鴉渺渺仙雲護鈿車三月明湖波瀉黛六
朝殘夢柳飛花青山門外聞湘瑟黃竹江干唱越娃最是

枌榆簫鼓裏夕陽煙水泊漁槎

晚晴簪詩匯卷一百六十五終

國書館藏書一百六十三卷正

...

...

...

...

...

...

...

...

...

...

...

...

晚晴籀詩匯卷一百六十六目錄

喬樹枏 七首

紀鉅維 五首

方燕昭 七首

顧森書 一首

朱培源 三首

喻先恩 一首

胡發琅 三首

張洵佳 二首

鄧嘉緝 五首

王振聲 六首

張景祁 十八首

王麟書 一首

張百熙 二十二首

陳槃仁 一首

譚宗浚 二十六首

陳文騷 三首

陳存懋 十一首

丁善寶 二首

許靜 二首

閻南圖 一首

百篇
謝南園一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

謝文淵一首

晚晴籀詩匯卷一百六十六

徐世昌

喬樹柎字茂護一字損菴華陽人同治癸酉拔貢歷官

學部左丞

詩話損菴官刑部三十餘年折獄明允晚歲入臺南三月遷學部為張文襄榮文恪所契賞辛亥後絕意時事恆寄居法源寺病革還家梁文忠評其詩云損菴為詩若未經意而高節壯志凜然可見

十月朔雨雪

十月朔雨雪或者疑非時橐駝馬腫背我自妄聽之宵來復盈尺豐歲真可期哀彼無褐家喜極翻成癡小民亦不癡往事心自知甯受一冬寒不受一年飢往者春夏交旱極夷生滋新秋大雨水畎畝淪汗池區區望歲心忍作祁寒咨願隨田舍翁共謝皇天慈故人武子卿示我山中詩

木瓜報瓊瑤我亦無媿詞希文做秀才憂樂無所私爲我
謝蒼生創鉅其愈遲

甯受一冬寒不受一年飢踏雪出門去朗誦山中詩聞者
竊太息問我將誰欺飢亦不易忍寒亦不易支相彼高明
家重樓深翠帷貂裘飲醇酒旁有太尉姬朔風天半來到
此忽倒吹吁嗟我農夫冒冷畊畚菑足赤雪沒脛衣單寒
沁脾婦人十指僵猶作無米炊臨流濯野菽兩手濡沙泥
負販入城市寒冰猶在衣天寒分所受米貴良異宜錢百
不滿升糴殮安取資我聞仰天歎媿極眞無詞敬謝田間
人艱難天自知輶軒或采擇爲爾平瘡痍

贈吳鐵樵

十年席帽走神京覆額佳兒已長成聞道苦心知孝愛更

能深識濟艱貞而翁胸有愁千斛課子家餘書百城終見
神駒起山澤渥洼雷雨一縱橫

紀夢二首哭吳季清

德瀾

昨夜夢故人對案相與坐右爲西安君曾篤在其左共話
西安事哭罷俯首卧嗟我神明衰夢境亦昏惰明明西安
君濃鬢色不挫卻謂是他人扼腕歎奇禍無乃示佛諦曰
此非眞我水火及刀鋸皆似空中過我老心學荒祇有淚
雨墮何當語濰縣謂是何因果

因果誰復識思君涕重流堂上有老母西南駛歸舟兒孫
各幼小劫後嗟遺留頗聞山中妻孝愛良獨周我時在官
守俯仰煎沈憂事後百餘日凶問始見投我亦歷九死六
馭方悠悠黽勉循舊職含淚推疲囚默念平生友存者各

九州齋居勤真契只坐不自修卻憶十載前歡會甯易謀
終須挂冠去長與無何游

武昌舟次次均答贈顧所持

印愚

顧郎年少吾能說今日江頭送我還手版教人憐姓字心
期知汝在湖山旌忠綿竹誰公論感舊西安有悴顏日暮
蘭成漫相擬本無詞賦動江關

丁未二月十三日舟過鎮江金焦在眼不得登覽

東坡居士行歌處苦對山僧憶故鄉今我南來闕登眺
船獨立心茫茫巫山巫峽凌青蒼呼召六丁排帝閭誰憐
衰翁一念力要與巴國開羊腸

紀鉅維字香驄一字伯駒號悔軒晚號泊居獻縣人同
治癸酉拔貢官內閣中書有泊居贖橐

詩話香驄爲文達公五世孫少嘗留意經世之學熟
諸掌故久居張文襄幕府迭主經心江漢兩湖各書
院監督存古學堂多所造就後門人私謚端慤先
生生平所作詩文矜慎自持鮮有存藁及門衰輯者
詩裁十三首耳又嘗就張文達講研畫理因精鑒別
陳散原贈君詩謂讀畫評詩有家法亦可覘其詣矣
夏日雨後集茗華室觀同人所藏書畫

那計癡兒笑老顛儘尋樂事傲頑仙雲煙過眼能娛我晴
雨何心莫問天畫裏溪山疑隔世鏡中勲業惜流年壯夫
正有屠鯨技如此消磨亦可憐

梁節庵招集吳公祠登高用朱文公天湖寺詩韻

望秋蒲柳早衰時旅食江關久未歸假日登臨舒倦眼寥
天風物尙清暉也知鈍士難供世爭信緇塵解浣衣欲撫
朱絃還斂手遺音誰與辨希微

飼鶴

朱頂元晴舊編衣芝田有夢未能歸區區莫羨潭皋粟上
相從來不要肥

雞鶩羣爭儘日忙一聲清唳晚風長怪渠本具凌霄翮苦
傍人家覓稻梁

西郊

雞頭菱蔓滿溪灣渺渺漁村白水環隄下行人隄上柳夕
陽驢背看秋山

方燕昭字伯融安徽定遠人同治癸酉拔貢官江蘇候

補道有十萬琳瑯閣詩存

何子貞曰余昔游韶客子箴同年署時其孫伯融甫
八歲即能詩越十一年予過邗上箴老適官兩淮
使出見伯融居然成立當即索其近作以衡造詣伯
融欣然出其稟以就教數年來已纍纍然如束筍子
秉燭徹夜竟讀之喜其年稚而才甚老為刪存若干
首欲付諸梓伯融意歉然謂欲有待予曉之曰以子

之才質充以學力他日所造正未可量然僕老矣不能待盍先以此集公諸世俾知音者不以予爲阿所

乎好
重九日登高用少陵九日韻

蒼茫四顧皆陳迹落日同遊戲馬臺寒雨滿城連夕霽黃
花三徑一時開乾坤秋色留清賞顏謝風流不再來爛醉
高歌容我輩夕陽天際莫相催

邵伯道中

一聲欸乃客驚眠月落星稀欲曙天曲曲碧波飛白鷺片
帆翦破半湖煙
粼粼春水淨無煙兩岸人家斷復連迴首廣陵看不見數
聲鳴雁夕陽邊

平山堂懷古

殘月在天蜀岡曉無數青山隔江小歐公攜客昔登堂梅
花萬樹生寒香太守與客共歡醉放眼江山皆渺茫如雲
勝事去未久佳地又爲蘇公有蘇公謫宦守淮南公餘賦
詩兼命酒嗚呼老髯與六一此去彼來無多日文采風流
甲一時千百年中無與匹名山終古依名郡物換星移幾
更運賤子乘槎海上來登堂不覺思高韻佳景依然人事
捐萬峯空自列堂前汀花岸柳半湮沒輕煙十里斜陽天
誰能高喚二公起狂歌痛飲開華筵

暮春北棧道中雜興

崇巒迴合客過稀匹馬嘶風下翠微刺水秧鍼經雨長黏
泥柳絮帶煙飛半巖日暮聞樵語一徑松陰喚犢歸杜宇
聲中春去盡落花芳草兩依依

客途十步九停車雨後嵐容分外加風趁鷺鷥低掠水露
黏蝴蝶弱依花深林有寺雲常鎖野渡無人日自斜太息
離鄉今兩月青山送我到三巴

觀蓮亭懷東坡

亭在眉州西南隅三蘇祠池內爲東坡所建亭中有碑刻山谷贊祠爲蘇

洵故宅永樂間重修地卽卧牛城遺址

坡公不可作寥落賸荒亭一水綠搖檻數峯青入庭古碑
眠蔓草細雨戰浮萍勝迹尋來徧孤舟傍郭停

顧森書字綸卿金匱人同治癸酉拔貢分省補用知州
有篁韻盒詩鈔

過彭澤次藻青韻

寂寞秋江上經霜木葉殷數村高下屋一路淺深山隱吏
潔身去荒城終古問我行愧飛鳥意倦不能還

朱培源字怡雲新陽人同治癸酉拔貢官靖江訓導有

介石山房遺集

詩話怡雲世居陳墓在葑谿之南少治經史善屬文
馮景亭宮允折節引重吳蔚若侍郎弱冠受業為詞
賦與葉鞠裳侍講王芾卿侍御袁渭漁戶部同學而
遇獨窮老為儒官庚子秋太息世變引疾歸里芾卿
詢以著述則云平生所作惟儷文差足自
信耳歿後鞠裳為選定文二卷詩一卷

洗兵馬

妖旗夜落蚩尤星礮聲怒捲飛雷霆倒瀉海水浴泰岱萬
里淨掃烽煙清我朝又安二百載列聖繼軌開承平拓地
遺置日南郡受降更築天西城地大物博孽芽伏草澤乃
有姦民生漢家厄運際陽九赤鯉青犢交橫行殷憂自古
啟明聖商宗恭默成中興今皇嗣位聖神武搗鼓一奏人
皆驚深宮撤簪憂社稷彤廷簡鉞求賢英朔方九道會義

旅招討四面開行營天戈所指賊氛息跳梁小醜敢縱橫
前年王師下淮甸崇朝瘴霧收金陵三吳士女獲安枕如
出水火衽席登揜匪豕突未知悔負恃爪距猶猙獰皇心
赫怒敕將帥務窮巢穴犁其庭已遣蕭相領財賦復移光
弼麾旗旌六師大舉入充沂不惜賞賚傾金繒軍心鳧藻
氣百倍如湯沃雪海澆螢昨聞露布馳驛騎逆徒果見天
誅櫻貝州生縛王則獻橐街斧鉞申常刑首惡就戮脅從
散青齊氓庶均安生捷音朝達百官賀上殿萬壽爭稱觥
告成郊廟薦禮樂敘次勲力酬功名金甌一統更無缺梯
航山海來賚琛珠囊暉麗燭寰宇妖鳥永絕羅平聲野人
喜劇不成寐坐視天狗潛無形銀河熠熠耿干丈安得手
挽洗八紘長使宇宙不見兵子孫世世安樵畊

秋日鄉行

平田無畔土枯白溝渠流淺僅盈尺小車歷轆行途中晴
久飛沙滿衣幘西風側帽苦塵昏何若江南水繞村漁莊
蟹舍吳淞路兩槳艇舫直到門

夜聞角聲

寒重江城月未高短衣幾輩走荒壕角聲吹斷清宵夢漸
覺霜痕上鬢毛

喻先恩字葆森遠安人同治癸酉拔貢有芸畚堂橐

太湖署中呈鄭湛侯明府

淡泊安儒素循良喜著聲民肥緣吏瘠事險要心平執法
參詩律攻愁藉酒兵晉熙一湖水不減在山清

胡發琅字肅藻江西興國人同治癸酉拔貢有肅藻遺

著

甲戌重九後登樂平縣城遂觀汪氏林園

鞿勒倦煩淫積昏況佳敘晨興擘幃景霍若沈疴去衰木
哀緒風勵霜響勁羽軋軋寒女機悠悠遠津鼓歸思結去
糴薄衿怨孤侶寒波逝日夜夏徂秋復舉含悽下隕垣結
寫咨菱圃寄言素心者勿厭山泉聚

山居

世故無洪纖可說皆爭端振衣事獨往延頸曠曩間春雨
灑平途百卉相新鮮寒村蔽遠樹落日明孤川山原澹紆
鬱車馬自不閒奧賞溢虛期徘徊意已先本無固得心途
窮輒自還

歲晚不適意俯仰越山木峻霜未輿梁清淺傷我足心知

道途緬離居在中谷入門聞歡笑慰問盈堂麓自與君別
來人事多反復吾言遂令負坎窞在心曲人生重離合誰
能數昔宿夜深澹相對忘言意彌篤

張洵佳字少泉江陰人同治癸酉優貢官上蔡知縣有

愛吾廬詩鈔

詩話少泉師工制藝尤邃於醫歷任陳留甯陵上蔡
等縣皆有政聲引疾歸結廬江上又卅年謝世詩主
性靈如其和
易近人也

寄同年華子才內翰

昔日鷺湖我舊游杜陵廣廈最清幽一從聽鼓長安道不
斷思君明月秋卧病相如仍健飯依人王粲尙登樓他年
鴻爪重重印訪戴還乘雪夜舟

自三峯至興福

興福今重到唐時寺有名泉聲幽澗滑山色晚霞明穿徑
篁爭出窺人鳥一鳴野僧癯似鶴相揖淡忘情

鄧嘉緝字熙之江甯人優貢候選訓導有扁善齋集

詩話熙之散文宗桐城詩境寒瘦與上元顧石公江甯秦伯虞諸君有石城七子之目祖解筠總督浙閩父子楚太僕與諸父文愨公皆殉國難熙之少日流離工詩文善楷隸雖託門蔭貧困以老故發爲歌詠如秋蟲寒雀多窮苦之詞

秣陵織業行

秣陵無好絲但誇織工巧非徒經緯多亦貴顏色妓承平
之日甲天下水載以舟陸運馬富商大賈工負販仰給至
無游手者兵燹以來未復業湘鄉相公發軍帖招集四方
織戶來吱吱軋軋機房開機房開絲不賤火船載絲出洋
去富者乾沒貧不便今年絲價高於珠我見童子泣路隅

自言家有織機匠年年衣食才有餘而今十機不織一身閒那得搖絲車我爲童子三歎息長官機捐設正急

平原君祠

翩翩公子有遺祠想像風流奠一卮臣亦毛生思脫穎不知可有處囊時

人日宴集莫愁湖卽席

莫愁湖上逢人日勝侶招攜躡屐雙舉酒心情還屬客登樓風景獨當窗梅花破雪香生樹山色連雲綠過江慚愧羣賢遠相召醉扶春影渡漁矸

憶石公卻寄

別君何處最相思多在松陰月上時對我清輝皎如此故鄉儔侶可曾知尺書問訊勞相憶淺淺澆愁醉不辭還寢

劇憐風露冷願移殘夢落書帷

臨胸喜晤紹由同年

游歷來停黃憲車入門一笑各軒渠相逢每惜鬚眉老把
晤翻嫌音問疏高士愧懸徐孺榻經生爭識鄭公居厚期
無負名山業共擬元和郡縣書

王振聲字劭農順天通州人同治甲戌進士授工部主

事歷官徽州知府有心清室詩存

詩話劭農以水曹郎稍遷西臺有直聲論列皆持大
體出守徽州年逾六十期歲解組歸辛亥後自號心
清道人性雅嗜琴工書畫詩冲淡閒適如其為人鄉舉重逢壽登大臺士林稱之

歸路

恩恩曉起放歸舟兩岸霜痕滿目秋指點遙村疏樹外依
稀塔影是通州

自題小像

我面不自識我獨知我心欲古而不古似今而非今讀書
不甚解披畫常摹臨無事且酌酒有時還撫琴况遇好時
節花木有清陰悠然禽鳥樂我亦愛綠林靜觀皆自得幸
無塵俗侵寫意畫圖中聊以開胸襟卽時當行樂何必問
升沈

王趙次山同年前輩屬題魯齋年伯陽穀殉難事實敬

步公松球歌韻

天兵壓境除羣醜腹負將軍握樞紐賀蘭擁眾盡熊羆
睢陽危立無刁斗况乎陽穀僅彈丸固圉無庸兵力厚坐視
不發一旅師竟任孤城入賊手宰官五日京兆耳胡不託
故越境走丈夫志節卓如山進退詎因人左右百里之城

當要衝巖疆豈容賊人有一邑之宰朝命尊臣節當爲天子守鞬刀單騎奮直前嚼齒捐軀不顧後誓甘一死報朝廷天經地義正非偶喬材本自起巖阿勁草絕不委澤藪樹立早負凌雲姿艱貞豈避狂風吼正如瀧岡松結球瑰奇鍾毓由天受赫赫天祖所鑒臨烈烈風沙難雜蹂移孝獨完臣子心仗節聿昭歲月久宜乎繼起皆達人偉烈豐功同不朽

張船山先生嘉慶庚午出守萊州冬日履任次年辛未冬乞休壬申春二月解組歸時年四十有九予光緒乙巳出守徽州冬日履任次年丙午冬乞休丁未春解組歸與先生若合符節然予年已六十有六矣因賦二絕誌之

蓬山雲海一年游冬往春歸太自由詩畫興濃官興淡徽州頗不讓萊州

一到蓬萊卽告歸早知四十九年非我今周甲纔回首愧聽旁人說見幾

論詩

詩到三唐已別裁不圖生面近重開字能泣鬼無靈氣語必驚人有霸才七寶樓臺迷片段九天珠玉障塵埃百思索解終難解安得香山老嫗來

張景祁字繁甫錢塘人同治甲戌進士官連江知縣有

孳雅堂詩

臺灣紀事詩

臺灣撫番開山之議初於沈文肅公嗣後諸大吏相繼成之生番次第就撫臺

北設立郡縣繁盛伴於內地朝命督撫歲一巡視屹然爲瀛壖奧府非止如鄭氏建國固於一隅也

偶閱近人臺灣雜詩病其摭拾瑣屑未見其大因另賦入章以紀之

塞天筭木絕人寰帝力經營到百蠻自昔嵎夷會建宅尙

餘盤古未開山朝廷鄭重珠厓議瀛海周遭赤縣環獨怪

嚴霜飛暑路八同關外振師還

光緒元年六月吳霽軒鎮軍開路至八同關嚴霜積

嶺土皆衣皮

洪濤山立鹿門開澳市風腥蜚戶來樓閣幻成蛟蜃氣兵

戈橫掃鬪體臺

生番嗜殺取鬪體爲飾玩以多者勝

慣從蕃舶徵瓊寶誰向

昆池驗劫灰莫訝趙佗輕敵漢擎天孤柱亦雄才

衝波樓櫓下澎湖銜壁降王出國都絕域漫誇天設險靈

山忽見海呈圖修羅好戰今何有窮髮開荒古亦無從此

冠裳被殊俗不緣吾道歎乘桴

天教鼇足奠滄溟海若東來盡效靈氣洩金銀窮地脈志

搜神怪補圖經雞番也解輸寶布雉堞爭看建屋瓠持節
那堪回首望中原一髮萬山青

怪雨盲風海外多拊循百洞待天戈屯田有策師充國辟
瘴無方療伏波但使投文馴巨鱷底須蒙鼓斫靈鼉詔書
惻怛來窮島喜聽蘆笙四面歌

奧府由來擅海王不因地力盡農桑接天瘴雨枕榔暗繞
郭鱗塍薯芋香漫說豐穰占鹿社休矜貨貝出龍堂願教

佩帶無牛犢棨戟何勞歲渡洋

漳泉與粵籍互分
氣類動至械鬪

琅嶠蒼茫接大瀛全疆鎖鑰上游爭穹廬散結千村寨戰
艦分馳十道兵地偪諸夷成互市天生一島作長城防邊

早建憂時策莫倚旃裘帳下盟

元年日本窺伺臺
城和議成始去

憶從閩海逐浮鷗仰愧元珠濁水求蠻語未參宣武幕月

明空弔庾公樓

余初來閩丁中丞自臺檄調命佐戎幕因事不果今中丞已歸道山不勝悽感談

瀛有客搜奇句破浪何年補壯游應笑張騫多鑿空欲從

鄒衍問神州

臺疆雜感

基隆形勢遜安平使節偏屯北府兵籌海十年成鑄錯東

溟從此失金城

安平險隘基隆夷曠建省臺北誠為失計

井邑初開盡廢田獅毬通道集人煙而今還作青蕪國屈

指滄桑幾變遷

臺北府初建時圍民田為城自獅毬嶺開鐵路遷居始眾僅十年耳

皇仁偃武卹創痍豈把珠厓棄若遺窮髮一隅懷漢德魚

龍隊裏樹旌旗

虎符龍節鎮全洋帳下兒曹似將狼未見寇鋒臨戰壘忽

驚刃血濺公堂

唐中丞犒賞卒伍中軍參將周某某乾沒過半亂弁李文魁殺之遂統其軍

島國新更自建旄登壇拜印勵同袍煌煌露布書猶溼一

葉扁舟駕海濤自割臺後臺民自請為民主之國以巡撫為大總統不十日而事潰矣

劫奪殘傷事可哀軍儲百萬委蒿萊摸金校尉知多少不

斬樓蘭一級來

大旗日落將星孤半壁支持仗寄奴猶道越南雄略在鴉

軍齊作黑雲都劉淵亭軍門駐守臺南寸籌莫展前在安南抵禦法夷號黑旗軍今仍其名

絕島塵生動鼓鼙閉關難得一丸泥雞番亦懼刀兵劫越

險爭防大甲溪倭人既破新竹進攻臺南各縣傳聞生番護助劉軍扼守大甲溪

昔年作尹海東頭宮闕金銀發隱憂眼見蛟龍營窟宅從

今域外問誰收余幸淡水時曾賦水調歌頭云本是蛟龍窟宅誤認金銀宮闕征戰幾時休竟成今

日語

投荒念亂溼青衫時事貼危口欲緘差喜故人無恙在身

經破冢得歸帆

署臺灣道陳仲英鳳山縣
俞東生兩同年均內渡

王麟書字松谿錢塘人同治甲戌進士官萬安知縣有

慕陔堂稟

贈廬陵胡鳳九員外苞

鳳九員外古之狂生友死友醉勿忘少年殺賊桐樹岡賊
平棄刃歸故鄉故鄉犖确文山陽日星在上分光芒古樸
拙塞為文章有司苦以繩尺量行年七十身且強山行百
里攜餼糧閒來覓醉如渴羌

張百熙字楚秋號潛齋長沙人同治甲戌進士改庶吉

士授編修官至郵傳部尚書諡文達有退思軒詩集

詩話文達久直南齋知遇極隆甲午後痛心外患故
於變法改革興學諸大端多所陳奏汲引才智惟恐
不及以是時論翁然歸之辛丑後殫思教育志未得
行其詩款款忠情真有浣花每飯不忘君國之意題

因薦康有為獲咎而作而同時題畫馬詩云駑駘滅
盡天閑色神物何時一降真又復不能忍俊蓋其愛
士性成有不能自已者黃仲張贈以詩云浩浩橫流
憂國夢堂堂白日愛才心論者謂足以眩其平生
生詩彙屢自刪削臨歿付其門人王式通校刊

別屠梅君庶常 仁守

風塵荏苒黑貂寒異代關河馬上看曉日一鞭揮手別亂

沙如雪糝征鞍

酬秦夢九同年 錫齡

故鄉嗟爾路迢遙亂後民如草木凋話到十年兵火事夜

深茅店雨瀟瀟

聞笛

秋城月小銀河夕孤館燈昏正愁寂萬瓦沈沈露氣深誰
家冷擲高樓笛微風低度得纖妙宛轉悠揚意如惜此意

分明入倚欄相思何處不關山銷魂莫按楊枝曲瘦盡離人鏡裏顏

丁穉璜宮保丈節署讌集談次及山陝近事感賦

觥觥宮保秉壯猷森列兵衛擁八駟開軒坐我爲我語魯酒不解蒼生憂去年山東多難民今年山西人食人安得輸糧太原道五百萬人同一飽

北風北來雁南飛哀鴻四野將安歸黃狐白晝入人室涇

陽幾日天無輝

陝西大饑涇陽叛勇脅流民爲亂

葭萌關頭雲氣惡遠控

裊斜連劍閣官軍慎莫疏邊防川北亦復嗟年荒

市橘

我家山中雙橘林秋來結實如黃金客游道遠那得食泥土汗腸塵滿襟阿奴市之自村谷啖我忽如餐露菊徑思

持此向風塵涼徧炎炎貴人腹炎涼異情難可知霜重且
保瀟湘姿清香貢入蓬萊殿莫忘寒山晚晚時

書夢

昨夜王師大合圍驍騰萬馬盡駢駢八方草木森兵氣一
震雷霆壯國威天上喜看飛將落陣前生繫左賢歸濤聲
捲地驚殘夢孤艇鐙昏百事非

白帝城謁昭烈廟

澹日頽雲晚蕭颯蒼莽荆榛見荒堞漢家寂寞千載餘一
片遺墟壯夔峽憶昔先主師東征七百里路紛連營獠亭
折辱亦天意夜遁乃入公孫城永安舊事難重問玉殿空
山豁幽悶躍馬全荒割據心嘯鶻尙帶偏安恨君不見建
業還都王氣銷樓船直搗金陵潮吳宮花草黯春色祇今

故壘生寒颿，又不見阿瞞。漢賊傾天下，末路分香淚。空鶴
一代英雄讓，使君漳河鏟。盡銅臺瓦成敗，三分跡已非。獨
留祠廟鎮崔嵬，年年灩澦灘前水。嗚咽東流更不回。

君貽伯翰見過

金莖不解孤懷渴，玉樹欣攀二妙姿。夢裏瀟湘共清淺，愁
中京國各淹遲。談深燭影低窗窶，秋老霜威入鬢絲。龍氣
鬱蟠雙劍在，豪情相望夜闌時。

送舍弟嘯石入閩

塵勞汝命無甯歲，歲暮天寒更遠游。閩海煙波懸萬里，楚
江風雪下孤舟。讀書識字終何益，別婦拋兒不自由。我亦
艱難多病日，鵲鴿沙晚思悠悠。

過蔡與循兄寺居

長安五城朝復昏古寺冷落城南根百年鼎鼎不相待萬
事悠悠難可論嗟老未老鏡中影欲歸不歸湘上村祇應
吾黨二三子早晚造君來叩門

和黃麓泉戶部膺湘軒雅集之作

酒讌共賞湘祠秋寄舫應同湘上游雲梯一取古時月吹
管三更何處樓西江小社得君好君時主小西江詩社東軒新詩開
我愁吟餘撫枕發清嘯破睡不須茶滿甌

題瀟湘寄舫

我從瀟湘來苦憶瀟湘水不見瀟湘見明月月下關山幾
千里去年秋氣入悲歌今年秋來情更多張翰蓴鱸等閒
事扁舟不決當如何香王老人謂徐中丞丈發奇想宦海蒼茫
支奇舫破浪時無宗慤風蓬萊路阻行安往眼底滔滔不

可云荒荒溟渤一迷津狂瀾勢倒誰能挽愁絕中流擊楫人

青城山歌題易中寶觀察

順鼎舊游圖冊

青城第五之洞天真籙紀自軒皇年寶仙九室此福地上
司岳瀆蟠西川二千里遠勢橫絕蒼然秀壓坤維裂下界
低飛灌口雲高臺近見峩眉雪靈區奧府接紫冥搜奇討
勝徵圖經棲眞古有丈人觀化鶴今誰徐佐卿我行舊是
成都客惆悵名山游未得妙繪何期入塵眼蕉窗斗落芙
蓉色手君青城圖誦君青城詩眞形縹緲不可見想見錦
屏玉壁初攀時幽巖猿鳥應前導采藥相逢幾丹竈瑤草
琪花世外春俗緣凡骨都稀到石泉如雨灑玉壇天風颯
沓非人間上清晶晶日月古太素漠漠冰霜寒行歌跨鹿

剛秋霽卅六霄光碧無際蠟屐歸來萬綠中襟裾半帶星
辰氣君乎壯游誰與同爲君吟望寫靈蹤徑思六翮凌風
去飽看岷山第一峯

春隄試馬圖爲何潤夫京兆題

東風綠盡西湖樹春好憑誰覓春去得意何郎試馬來尋
春直到春深處繡勒錦鞵新鑿蹏一鞭花雨草萋萋天然
畫景垂楊路知是蘇隄是白隄飛鞚翩翩疾于鳥駿馬才
人爭驟裏可憐綺陌豔陽春不見離宮舊時道御道當時
迤邐開南巡仙蹕扈龍媒羽林萬騎從天下天廐驂駟盡
軼材兩驟星馳人事改宮門冷闕湖山在蕭條林壑鳥呼
風盛事眞應曠千載寒日銅駝感慨中乾嘉荏苒到咸同
黃塵蹴踏兵戈起百戰才收汗馬功遺蹤剗盡繁華歇擬

笛聲淒唾壺缺莫問龍盤九殿雲更無鶴守孤山雪尊酒
流連退省庵丙子秋余訪大司馬彭雪琴丈於西湖退省庵丈招飲湖上流連竟日幽尋我
亦舊停驂南屏鐘動掩歸轡韻事無人寫夕嵐君心清絕
侔冰玉選畫徵詩燦成軸一晌春游二十年年年夢墮西
湖曲去住休論今昔情壯懷如月向君傾據鞍顧盼英雄
事君不見麟閣雲臺萬古名

漫興

廣樂鈞天事有無夢回帝所一身孤人間何路求三島世
外扁舟隔五湖耕釣逝當從漫叟文章聊可學潛夫藥洲
洲畔花如繡獨向西風聽鷓鴣

畫馬

夢駕昔聞千里馬漢詔云馬有奔蹏而致千里士有負俗之累而立功名夫跡弛之士夢駕之馬

亦在乎御之而已古良工誰是九方歎更無羈勒遭驚敗
人求才之意如此 如有馬驚車敗陛下縱自輕奈
高廟太后何見史記袁盎傳 但有新圖寄慨呻隱痛蒼
生餒豺虎高歌青眼望騏驎駑駘滅盡天閑色神物何時
一降真

潮州劉教授

鳳輝

以所輯東坡居士居僮錄見貽意

有所感遂題其後

紹聖當年黨禍深遺編千載一霑襟神京北望恩非淺瘴
海南遷老更侵報國孤忠空白首投荒九死見丹心桄榔
尙說庵居舊笠屐風流何處尋

意有未盡再題二律

奇才知遇感先皇晚歲遭回徙瘴鄉萬里嶺南餘涕淚千
秋海外有文章采風手校居僮錄醉月心懸載酒堂

僮距瓊州

三百里而遙按試海一事類公差不恨七年供奉殿西廊

南無由訪公遺蹟用公次韻韶守詩句公入侍延和前後七年百熙入直南

齋亦七年詞臣遭際偶合前賢不禁誦公詩而竊幸也

要使天驕識鳳麟使用公送子由讀公詩句氣無倫豈期變

法紛朝政差免書名到黨人修怨古聞章相國推恩今見

宋宣仁百熙以主事康有為講求時務所識博通之士多

諱酌中稱道其才者因以其名咨送特科當聲明蠲除忌

否不可知復據實疏陳並將該員業蒙欽派差使可否免

其考試之處聲明請旨又片陳中國自強在政不在教請

明降諭旨禁用孔子紀元七日休沐等名目以維持名教

而免為從西之導均仰邀留覽及康難作而被罪者眾百

熙獨蒙特恩鐫職留在以視東坡之遭遇宣仁有過之無

不及過書舉燭明何在削牘真慙舊侍臣百熙謝恩疏引

南園畫馬為翁尚書題

天不見房星化馬如化龍地不聞渥洼產馬成青驄腥膠

六合盡泥滓誰與汗血收奇功咄哉何處得此種意態雄
奇聲價重軒然神力掃駑駘似恐馳驅憂駕芟南園畫筆
迴絕倫此馬一出真空羣想當奇氣發胸臆潑墨淋漓如
有神意匠經營工畫骨矧霍精靈下雲物徑思擘駿籥崑
崙佇盼成龍蹴溟渤豪情壯志不可償風塵萬里天蒼茫
沙寒草衰苜蓿短但見凡馬多肉誇騰驤監牧天閑有專
政御馬深期知馬性驪黃牝牡亦何有要豢長材成上乘
黃金騎綠玉螭絕足不假勞鞭笞識途之效古所重發縱
指示今其時按圖低徊求畫意聞道人中有騏驥

驂鸞

驂鸞自何年祠宇猶空山春雨沈丹竈秋星炯瑤壇窈窕
帝子靈月影時姍姍煙岫暈螺黛風泉鳴珮環仙境闕巖

阿神光日煊爛荒碑字明滅遺蹟蕭梁間縹緲散花天凡
骨無由攀空階草色晚遂殿松陰寒不見蓬萊宮但見飛
鳥還誰能測元邈靈妙傾人寰

陳棨仁字戟門號鐵香晉江人同治甲戌進士官刑部

主事有藤華吟館詩錄

詩話鐵香以庶常改部遽乞養歸主講閩中各書院
凡三十年成就甚眾同時與謝枚如章鋌稱閩中兩
大師著述十餘種多未刊行
詩非專家要足規其所學

漢平津侯鏡歌

背銘兩行十字曰大漢平津侯元朔
五年造平津侯者公孫丞相宏也舊

藏同安

呂氏

公孫丞相儒家流七十射策獵封侯布衾脫粟不可見尙
有一鏡爭千秋銘一十字大及尺過眼如窺漢月魄鐵鈕
翠環薤篆疏銅花碧繡菱紋蝕當年東閣誇宏開惡賓故

人紛還來清光能洞汲黯直朗鑑偏失江都才招賢館靜
空明發盡道晶輝映毫髮可憐日日照衣冠不照輪臺戰
死骨茂陵金盃秋未槁牧豕舊容鏡中老荒涼片月棄不
收殘字空傳元朔造

譚宗浚字叔裕南海人同治甲戌一甲二名進士授編

修歷官雲南鹽法道有荔村草堂詩鈔于滇集

詩話叔裕才學淹博名滿都下自編其詩爲八集大抵少作以華瞻勝壯歲以蒼秀勝入滇以後諸詩雖不免遷謫之感而警鍊盤硬氣韻益古

春雨

側側微風澹澹煙徹宵疏雨總堪憐一春况味如中酒三
月輕寒未卸縣里巷時光祈麥處山棚生計焙茶天綠陰
如幄花如霧爭遣詩人不惘然

落紅門巷記闌珊日日陰晴稱意難潤氣微知炊竈溼繁
聲翻當釣篷看江鄉春草思游子鐙影檐花稱冷官愁絕
天涯多舊雨可能車馬似長安

悄倚闌干覓句來片雲頭上已先催惜惜芳徑無行迹草
草年光負酒杯詞憶杏花虞學士句傳梅子賀方回南朝
四百煙中寺多少樓臺暝不開

喜看新綠滿亭皋一片青山望眼勞但有關心談稼穡儘
多生意到蓬蒿潮頭漲滿魚兒出陌上塵銷馬首高無限
綠蕪門外長莫將顏色例青袍

爲問

兵戈猶未定復此寄江干落葉下前嶺孤村生暮寒貧疑
詩卷崇病愛酒杯寬爲問秋來燕雕梁幾處完

呂紀畫鷹歌

華堂月淨蜚颯露主人愛客陳縑素怪茲咫尺軒楹閒何
得突兀槎枒之古樹細觀勁翩翩然翻想見爐錘筆端鑄
我聞畫鷹者最數姜楚公邊昭及林良厥技頗亦同紀也
下筆相追從方其冥想動真宰意欲慘淡無天功當年侍
從南薰殿豹房日暮爭嬉宴泰彬前導朱壽來追逐圍場
若馳電偶然點筆成此圖往往深情存譎諫不圖宮闕圖
草萊寓意微茫果誰見嗟余根觸百感生與此舊恨偏殊
情鷹兮稟氣最猛鷲啄睛拍腦羣雛驚胡爲斂伏不一試
草間狐兔猶縱橫北風昨夜蕭關起願爾決雲馳萬里一
擊亂羣空再擊妖領死埽除六合會有時莫向凡禽驚爪
觜吁嗟乎材官突騎今豈無驚痾局縮非壯夫鷹兮鷹兮

人不如儻登劉表高臺上我亦乘風試一呼

泮塘晚步

西郊獨歸霧冥冥
芡茹未長菱筍生
幽禽避客就煙沒
黃葉打門知雨鳴
前溪後溪有竹樹
東崦西崦開柴荆
吾鄉勝游自不乏
安用陽羨籌躬耕

峽山寺

峽中無白日當晝亦常昏
雨急瀑爭地峰陰雲出門
忘機飛鳥暇閱世老榕尊
莫問修羅劫殘僧幾輩存

鄜湛若天風吹夜泉硯歌

書君懸鉞垂露之奇篆
寫君離鸞別鶴之悲吟
忠魂縹緲去已久
但有貞珉一片知君心
當年此石誠非偶
滄鬱春雲落君手
用之愈久德愈全
合伴書窗爲益友
鴉咋嶺鬼

門關子然書劍來
猿蠻山魃猙獰伏
洞裏巨蟒睨賜懸
林間硯乎辛苦定
同厯幸不棄置埋
榛菅不然軍中時
草檄擲筆懸空飛
霹靂丹心耿耿長
不磨願與東南支
半壁積城一角陰
雲愁日影慘淡悲
清秋奇才豈僅屈
宋並毅魄直同張
許游片石猶存豈
君意悔不烽塵遭
破碎硯池點點浮
青痕尙似憂時賈
生淚橋亭字墨妙
碑此硯與之應並
垂忽憶舊時好琴
癖畫有同嗜安能
一一搜剔全無遺
我來摩挲看款識
閒對遺蹤思往事
洗處曾來虞苑游
光寺洗硯池爲
鄭湛若隸書兒也見嶠雅捧時定合青琴侍
君今騎鶴歸

神仙都

舟中讀阮太傅重刻西嶽華山碑拓本

帝臨高居奠八維兌位所宅金神司厥有華嶽崔以巍林
巔谷越相蔽虧羣峰刺天白白差差泄雲不散陰霧披荒霾
陡絕人莫窺升降靈霽嘉穎滋福庇黎庶除癘疵在昔炎
祚朝政隳浮屠媚鬼興淫祠詛祝妖惑崇祥禩况茲嶽瀆
尊神祇宜有翠琬銘豐碑陳留徵士鸞鶴姿博瞻淵雅工
文詞真跡妙絕時人推羣龍宛宛出水嬉五采鳳羽垂褱
縱想當落筆縱橫時腕力裊挂如懸絲偃仰回復無不宜
千年巨碣爭護持剝蝕青翠蟠蛟螭寶光迸射來天墀上
掩奎宿騰斗箕帝曰斯寶誠絕奇六丁下取雷電隨地媪
搖撼驚莫支嘉靖中地震此碑遂毀人間傳搨嗟漸希三弓同異紛
差池琅環館主持使麾倚工摹刻重補治縝密方勁爭毫
釐益以別本全無遺若金鎔鑛玉泯泯原碑有闕字以成親王所藏長垣本

別摹刻 嗟哉隸法明季衰破列軌範爭爪離國朝媿雅多
補上 大師遠溯秦漢卑獻義競闢閩奧開藩籬末流汎濫吁可
愷體制詭越遺罽羈或乃醜拙兼斜欹方若畫屋圓穿錐
俯趨鼠穴遺坦夷刻畫西子成戚施古法漸邈誰復追此
碑摹刻時代遲朗若刮日黃金鑱惟川有涘山有基正諦
在是奚外歧况今廿載兵塵馳潢池盜弄煩鞭笞嘯聚妖
醜藏魅魍文選樓前劫火悲漢原秦時多旌旗朱門貴邸
羅尊彝亦復散佚隨僕廝深山陵谷安可知他時歲月隨
遷移購此或亦千金貲我聞嶽廟臨西陲碣銘壁畫鐫屢
屢何時赤手攜甌椎搜剔榛莽窮險巖或有銘碣前代垂
與此合卷裝琉璃平生宿願難遽期側身西望長嗟咨

游百花洲

聞道東湖勝尋幽愜討論雪光寒照座水氣暗侵門鷺起
沙隄淨魚噉石穴渾塵闥隔咫尺佳景儼郊樊

十頃淥波淨荷花相間香平鋪輕浪暝併送小亭涼蛤蜊
緣隄堰鷓鴣瞭石梁論園如買夏何必減滄浪

曲榭千房閉長廊百折分引泉微注覓疊石欲生雲竹獻
助吟趣苔乾疑篆文天工饒點綴沙鳥自成羣

老柳如僵立何年插小池迎風低散縷拂水卧生枝自得
蕭閒趣偏多倔強姿如何經劫火鮎冉似當時

灌圃平生願來看勝地幽園蔬收鴨脚溪芡熟雞頭劇藥
應旋長烹鱗不用求雖無賢地主勝賞足句留

避地懷蘇子孤芳迥絕羣高風秦博士逸操漢徵君亂世
容閒卧斯人不可聞廊碑重撫讀湖氣冷斜曛

享祀崇祠配風流老輩存詩名猶未沫經術至今尊側想

干戈日曾經祲沴昏斯游良不易雅賞接琴樽祠中供蘇雲卿木主

並以宋牧仲阮雲臺兩先生配祀

吾鄉原水國名勝擅林泉對此卜居地應吟招隱篇待營
因樹屋擬蓄賣文錢相約羊何輩歸耕且授塵

泊舟南昌大雪作歌

吾家嶺海居南陲赤日長照恆炎曦隆冬飛雪灑不到但
有干樹梅參差榻來豫章偶攜酒雲氣晝黯紛迷離波濤
叫呼朔陰集山石凜冽寒颿吹天公忽蹴癡龍起倒瀉瓊
瑤八千里橫空欲度西山來疾雨斜吹入江水若有人兮
在雲中跨縞鶴兮驂素鴻瑤池闐風赴高會墮羽飄墜來
虛空盤旋回折不相下變滅的皜難爲容不然河伯張宴

濃洞庭樂奏酣笙鐘纏頭十萬翦鯨鯨片映出蛟鼉宮
前者迸入煙濛濛後者捲作濤洶洶噫號聲勢塞大塊一
洗萬古塵沙胸隔岸遙看霧痕溼枉渚迴汀紛出入天前
闊遠干樹湧沙際冥茫萬鷗立我生憔悴百不宜窮愁慣
被江神欺倦游千里厭久泊忽看世界堆琉璃江山奇景
恣游眺造物貺我原非私偶然留滯亦殊得豈必捷足爭
先馳君不見章江門外帆如織干枝萬枝作竿直幾人住
鄉得安適大半風塵走南北烹羔暝酒渠有命此樂豈須
吾輩得眼前歡會且高歌何用牢愁歎湮塞夜來沈沈月
無色萬種愁心亂難極會當喚取潛潭蛟起弄霜天吼銅
笛

循獅子嶺度十八盤

奇峰欲干天失勢忽斜落彎環疑互纏奮擊起相搏萬疊
憑巘屹一條開犖确望中見紆鬱意外出巉惡怪稜低鉤
衣仄勢怒齒索茲爲入山路有似門啟鑰微生寄輿夫喘
息不敢作登頓愁趺疲窺覷慮魂弱不信人世間坦途尙
清廓遙見青林端禿當響檐鐸知有梵宇崇盤空橫岑嶸
雨中由黃草坪過武陵山

涉想登靈峰昏旦忽移景飛黔失寸暉晦色惑諸嶺賈勇
循澗崖筍鞵任馳騁風霆浩嘯翻草樹逞妍靚陡緣萬松
巔趨下若窺井一諾許山靈顛踣吾有命嫠嫻趁蒙茸暗
昧露光炯縈幽一巖穿造極萬峯迸卻乘險阻嘗喜得妄
邪屏險中博歡娛事過趣彌永軒冕有危機何者眞樂境
平生游屐多屈指半天幸山中難久留浩歌下蘿徑

游甘露寺

一峯藏竹底，竹外得天光。
淺瀨通魚穴，空崖聚蜜蜂。
巾瓶添淨契，蔬筍亦眞香。
攜得山雲返，城中作晚涼。

青蓮洞

洞有周伯琦篆碑

仰窺石下垂，仄步石橫拒。
平生恥折腰，至此隨仰俯。
茲爲青蓮龕，榛莽限深阻。
捫苔負壁行，魂弱不敢語。
悄然風葉飛，恐有山魃覷。
元人舊鑿碑，洞狹不容武。
側身偶蹲窺，礮礮垂玉箸。
昔人絕技傳，未肯草木伍。
好奇此雕鐫，作計亦良苦。
久立畏森寒，撻衣出苔戶。
攜將白石還，好向僧廚煮。

小蓬萊峰下有瀑泉三疊旁列橫石可坐十人

是誰觴羣眞，澗底置瑤席。
窪尊久不存，羅列贖奇石。
遙對清泠泉，各各據高壁。
出竇紛窳通，注谿錯迴直。
意同長風

爭急起赴石隙羣山如踔跳聲過有餘力道人了不聞合
掌對凝碧洩怒任叫囂守柔自沖默漸進豈不佳胡爲苦
相激感物遂寫懷浩歌日將夕

書事

新傳嚴詔馭娑宮玉虎晨威一震同卧護西陲稀健將角
巾東第到羣公本來袁竇原殊氣卻比蕭周已盡空獨使
至尊憂社稷未央前席策平戎

袞袞鵷鸞又一時上林阿閣最高枝朝恩別自求新劔世
事休教覆舊棋宛馬蒲萄前代略河魴楊柳中興詩宣光
盛烈非難嗣燮鼎調羹望禹夔

陳文騷字仲英晚號槁叟大興籍祁陽人同治甲戌進
士改庶吉士授編修歷官安徽候補道有養福齋集

詩話仲英先生爲余祖姑之子由翰林庶守金華杭州臺灣太平廬州諸府權臺灣道精求吏治鞠獄草牘從不假手僚佐其治績尤以搜治金華八堡山盜匪爲最著郡人至今稱之在詞曹日嘗治易撰易說關井以下十七卦適出守未竟其業晚年哀所作詩古文辭及公牘文字爲養福齋集未刊燬於火其孫誦芬摭拾零稿鈔綴存之皆非其至者也

漸西觀察提點山石中江父老咸懷怨思獻詩三十

韻以志惓懷

蘭蕙與蓬蒿同生不同類庭芷共江蘼隔山扇馨懿植物有本性斯人洽氣誼譬如渾與淄源分味一致方寸契合微名言無可誌下走滯京洛時俊紅塵萃尤推彥伯賢一見驚小異旣入季野室氣概四時備益然飲太和不醪亦自醉何期後十年移官戲下吏文讌縱清談往往抒宏議懷抱鬱青霞淵雅而純粹恍遇祖約談次日如失睡有時

涉文囿洸洸羅滿筍河東記委篋崇山識簡墜憐我嵒窳
才賴公琢成器明月照人影高雲託廣庇不圖好風吹新
綸忽遷地休景知邊情盛績御屏記鄭白千頃沃歡呼迎
新使美意漢京洽舛望鄣南懟持鞞念舊恩攀轅灑新淚
我心益戚戚欲言無一字公方鬯遠猷豈爲私情累惟祝
蚩蚩心上感羲軒意牙纛錫專征江海重膺寄白髮舊部
僚老馬傷樵頓草亭築四休軒蓋行拋棄儻報我公來重
理出山轡短歌寄離愁煙波盪淮泗

乙亥元日廬州作

暖入東風凍乍開人隨梅柳渡江來郡符恰共韶光換凱
唱頻煩臘鼓催湖陽匪亂近日告捷吳楚河山空故壘趙張勳業數
奇才日邊漫指長安近昨夜觚稜有夢回

義馭蹇輪去似梭五龍六甲眼前過容添白髮梅偷笑官
比黃州筍欠多繞郭溝塍知土闢沿街煙火驗時和駑駘
雖老雄心在拔劍猶能斫地歌

陳存懋字竹香贛縣人同治甲戌進士改庶吉士授檢
討厯官浙江知府有冬心齋詩藁

詩話竹香與長沙張文達甲戌同年嘗共論詩文達稱空同竹香頗重大復其過盧生祠題壁四首爲使鄂時作都人傳誦有玉堂補竹圖文達爲題三絕云雕闌隱映碧參差手種琅玕玉幾枝記取五雲多處立一天風雪歲寒時排雲直幹影脩脩美蔭當年五鳳樓願箠四舞成不朽數莖垂海六鼇愁宜游試攬西湖勝兵事休論北闕書到日憑君問消息蘭亭脩竹近何如時竹香將改官之浙也

游盤山歸路口占

暮春殘雪點征衣曉起衝寒下翠微勝境難忘情脈脈名
山乍別意依依巖前芝草勞僧贈洞口桃花笑客歸萬壑

松濤千尺雪結廬何日學忘機

盧生祠題壁

一枕黃梁夢太長是因是想總荒唐人生自有天倫樂不
作神仙也不妨

車馬勞勞送客程邯鄲道上盡盧生若非生就神仙福炊
熟黃梁夢不成

海上蓬山路杳然目前困苦最堪憐人人飽喫黃梁飯一
枕安眠便是仙

荷風香送使臣車江漢英才擅作家聖主恩深難報稱昨
宵有夢到京華

橫溪泛月歌

東山月上露氣清松杉夾道枝交橫榜人無聲宿煙渚水

光蕩漾搖空明小舟泛月橫溪曲溪上微風動林薄寂寥
山館夜沈沈階下流泉響琴筑

七鯉鎮河隄晚眺有感

客裏光陰手一編人生如寄劇堪憐思量去日知來日惆
悵中年到晚年澗水白拖千尺雪夕陽紅漾半江天長隄
徙倚頻回首暮景桑榆好著鞭

補和管士一同年使鄂之作

浩渺長江拍浪浮江頭黃鶴古時樓一尊風月晴川夕萬
頃煙波鄂渚秋此日論文仍接席當年持節忝同舟迢迢
十載春明夢獨立蒼茫感舊游

秋夜憶弟

去歲南歸日孤舟潞水邊今年重到此衰柳散疎煙燕市

吾將老蘇臺子自憐悠悠分兩地明月幾回圓
未了向平願難謀陽羨田聯牀曾有約共被是何年草色
榮枯感萍蹤聚散緣南樓聞雁唳倚枕不成眠

游鳥門山偕陶心雲

不必奇峯劈巨靈天然蒼翠聳圍屏懸巖溜滴龍潭黑絕
壑雲迷鳥道青祖逖渡江懷擊楫屈原憂國且揚舲稽山
鏡水春如許聊共先生倒玉瓶

丁善寶字韞山濰縣人舉人官內閣中書有六齋詩存

九日游程符山寺晚歸

程符秋色好杖策叩禪扉不盡登高興無嫌傍晚歸石花
明澗水山月上人衣回首鐘聲起泠泠下翠微

對酒感懷

門前種柳綠成陰門外波濤深復深一念隨分人物我百年可有去來今君平莫定升沈數伯起空辭暮夜金壁上青萍緣底事宵來風雨作龍吟

許靜字海樓汝州人舉人官開封府訓導

與張勺波游龍王山

一帶長隄柳數行兩峯山色下河梁畫師最是碧翁巧添箇飛鴉趁夕陽

題朱梓皋湘江紅葉圖

家山遙隔大江流岸荻汀楓慰客愁游子還鄉爭一問扁舟滿載洞庭秋

閻南圖字搏九又字天池號蕪島榆次人副貢有南村詩草留影奩集

贈王居士

錫祉

竹杖醉時攜蕭條白髮垂高年須藥健野性學仙宜江鯉
迎潮釣山花趁雨移時人笑榜散多見葛巾欹

晚晴籀詩匯卷一百六十六終